



Йохана бичсн Сэн Зэңг

Нүр үг

Йохан Исусиг Бурхна мөнк Үг гиж Сэн Зэңгдөн үзүлжэнэ. Тер Үг күн болж, мадн дунд бүүрлж (1.14). Исус Бурхнас илгэгдсн Аврач, Бурхна Көвүн гиж иткүлхин төлө, болв иткэд, Терүнэ нернэ төлөд мөнк жирһл эдлтхэ гинэд эн дегтр бичүлгдсн бөөж (20.31).

Исус Бурхна мөнк Үгнь гиж нүр үгд бичэтэ. Терүнэ дару Сэн Зэңгин негдгч энгд зүсн-зүүл өвэрц йовдлмуд Исусиг урдаснь Аврач, Бурхна Көвүн гиж үзүлж. Цааранднь өвэрц йовдлмуд ю цөөлһжэхинь медүлжэнэ. Дегтрин эн энгднь зэрм улс Исуст яһж итксиг, Терүг дахж йовх улс болсна тускар бичэтэ. Болв зэрмнь Терүнэ өмнөс буцад итклэн хайсна тускар бас бичгдж.

13–17 бөлгүд Исус Эврэннь сурһульчнртаһан чирөһөрн харһад күүндсиг, Терүг кирст телүлэд хадхин өмн сө келсн үгмүд сурһульчнриг яһж белдсиг, теднд урмд өгсиг үзүлжэнэ. Сүүлнк бөлгүдт Исусиг бэрснэ, Терүнэ зарһин, Терүнэ телүлэд хадгдсна болн эмдрснэ тускар, энүнэ хөөн сурһульчнртан баралж үзгдснэ тускар бичэтэ. Хууль гүүһэд килнц харһсн күүкд күүнэ туск тууж дөрвлжн хавсрт орулж бичж (8.1–11). Яһад гихлэ, кесг түрүн зун жилмүдин бичгүдт болн орчулсн бичврт терүг орулсн уга, болв зэрмснь терүг талдан ормд орулцхаж.

Йохана бичсн Сэн Зэңг Христосар дамжад өггджэх мөнк жирһлин белг йилһэн үзүлгдж. Эн белг ода өггджэнэ. Исус – йовх хаалһ, үнн болн жирһл болжана гиж эн белг иткжэх улст нерөдгдж.

Сэн Зэңгдөн Йохан шажна бөөдл үзүлхэр өдгэ жирһлэс йирин юм-суд авч керглинэ. Үлгүрнь: усн, өдмг, герл, хөөч болн хөд, уста үзмин иш, терүнэ темснь. Тернь седклин тоолвр болна.

Учр-утхин зура

Орулгч үг 1.1–18

Уснд кирслдг Йохан болн Исусин түрүн сурһульчнр 1.19–51

Исусин церглт 2.1 – 12.50

Сүүлнк өдрмүд 13.1 – 19.42

Деед Эзнэ эмдрллһн болн залрж ирлһн 20.1–31

Товчлгчднь: Һалильяд болсн бусд үзүллһн 21.1–25

Үг күн болж

1 Орчлң үүдхэс урд Үг бээж. Үг Бурхнла негн бээж. Үг Бурхн бээж. ²Орчлң үүдхэс урд Үг Бурхнла бээж. ³Цугнь Үгэр дамжж үүдэгдж. Терүг угаһар юмн үүдсмн уга бээж. ⁴Цуг үүдэсн юмн Үглэ ниилэд жирһж. Жирһл күмни герл бээж. ⁵Герл харһуд гилвкнэ. Харһу терүг диилсн уга. ⁶Бурхн кү илгэж, күүнэ нернь Йохан бээж. ⁷Цуһар соңсад итктхэ гийһэд Йохан герлин туск герч болад ирж. ⁸Бийнь герл биш бээж. Герлин туск герч болад орчлңд ирж. ⁹Үг гисн йосн герл мөн. Герл орчлңд ирэд күмн-эмтнд тусж герлтүлнэ. ¹⁰Үг орчлңд бээж. Терүгэр дамжж үүдсн орчлң Бийнь таньсн уга ¹¹Эврэ һазрур ирж. Эврэ эмтн терүг седклдән орулсн уга. ¹²Седклдән орулсн эмтнд, Бийднь итксн эмтнд Бурхна үрдүд болх зөв Тер өгв. ¹³Эн үрдүд экиннь геснэс, күүкд күн залу күн хойрин седвэрэс төрсн үрдүд биш, эдн Бурхнас төрсн үрдүд. ¹⁴Үг күн болж, мадн дунд бүүрлж. Эн Үг маднд чилшго хээрлтиг, Бурхна туск үнниг үзүлв. Эцкиннь һанцхн көвүн болж Эцкэс авсн Терүнэ йосиг бидн лавта үзвидн. ¹⁵Йохан Терүнэ тускар чанһ дууһар иигж герчлж: Эн күүнэ тускар би иигж келләв: Мини хөөн ирхнь нанас ик чинртэ, юнгад гихлэ Тер нанас урд мөңкиндән бээдг бээж. ¹⁶Тер эврәннь ик байлг хээрлтэс маднд дам-дам сә кеһэд эдслв. ¹⁷Бурхн Мошеһар дамжад зака өглэ, зуг хээрлт болн үн Исус Христосар дамжж үзүллэ. ¹⁸Бурхиг күн төрүц үзэд уга, зуг Эцкиннь өөр бөөсн ор һанцхн Бурхн маднд Бурхна тускар медүлв.

Уснд кирсидг Йохана герчлһн

¹⁹Ерусалимд бээдг евреймүдин ахлачнр Йоханур гелнгүдиг болн Левихниг илгэв. Тедн ирэд:

– Чи кембч? – гиж Йоханас сурв.

²⁰– Би Христос бишв, – гиж тер дарунь Йохан илэр келв.

²¹– Тийглэ кен гидг күмбч? Чи Элья болвзач? – гиж тедн сурцхав.

– Уга, – гиж тер хэрү өгв.

– Чи Мошен келсн ээлдэч болвзач?

– Уга – гисн хэрү тенд сонсцхав.

²²– Чи кембч? Маднд келич. Бидн мадниг илгэсн улст хэрү-
хинь келж өгх йоставидн. Бийиннь тускар ю келнэч? – гиж тедн
сурцхав.

²³Йохан теднд ээлдэч Эшьян үгэр келж өгв: «Би эжго кэдэд
хээкржэх дунв: Деед Эзнэ хаалһинь һо кетн». ²⁴Тер әмтиг пар-
шмуд илгэсн бөөж.

²⁵– Кемр чи Христос биш, Элья биш, Мошен келсн ээл-
дэч биш болхла, юнгад чи әмтиг уснд кирслнэч? – гиж тедн
сурцхав.

²⁶– Би әмтиг уснд кирслнэв. Зуг тадн дунд таднд таныгддо
күн бөөнө. ²⁷Тер мини хөөн ирх. Би болхла Терүнә башмгиннь
бүчинь төөлх зөв угав, – гиж Йохан хәрүднь келв.

²⁸Цуг эн йовдл Бетәнья өөр, Йордан һолын дорд үзгин көвэд,
Йохан әмтиг уснд кирслсн һазрт, учрв. ²⁹Манһдуртнь Йохан
өөрдж йовх Исусиг үзэд:

– Хэләтн, Эн әмтнә килнц уга кедг Бурхна хурһн. ³⁰Энүнә
тускар би келләв: Мини хөөн ирснь нанас ик чинртә, юнгад
гилә, Тер нанас урд мөнкиндөн бөөдг бөөж. ³¹Би чигн Исусиг
кенинь медсн уга биләв, зуг би Энүг цуг Израиль орн-нутг мед-
тхә гиләд, әмтиг уснд кирслхәр ирв, – гиж келв.

³²Йохан эврәннь үгән батлад келв:

– Эрүн Сәкүсн ик деер Теңгрәс көглжрһн мет бууһад, Терү-
нә деер үлдснь би үзв. ³³Би Терүг меддго биләв. Зуг уснд кирсл-
хәр намаг Илгэснь нанд: «Эрүн Сәкүсн нег күн деер бууһад
үлдх. Тер күн әмтнд Эрүн Сәкүс өгх», – гиж келлә. ³⁴Би цуг
әнүг үзв, тегәд чигн герчлжәнәв, Эн – Бурхна Көвүн! – гив.

Исусин түрүн сурһульчир

³⁵Дарук өдртнь Йохан хойр сурһульчта хамдан бөөсмн.

³⁶Аашсн Исусиг үзэд, тер:

– Эн – Бурхна Хурһн! – гив.

³⁷Йохана хойр сурһульч тер үгмүдинь сонсад, Исусиг дахад
йовв. ³⁸Исус эргәд ардан хәләһәд, тедниг дахж йовсинь үзв.

– Таднд юн кергтә? – гиж Тер сурв.

– Рави, [хальмгаһар багш] Тана гер альдв? Келтн, – гиж
тедн сурв.

³⁹ – Намаг дахад йовтн, эврэн үзхит, – гиж Исус келв.

Цуг эн дөрвн часла болв. Тедн йовад, Исусин герт ирэд, асхн ора күртл бээв. ⁴⁰ Исусин тускар келсн үг соңссн сурхульчнрин негнь Шимон Пётрин дүнх Андрей бээж. ⁴¹ Тер эврәннь Шимон гидг ахан олж авад келв:

– Бидн Бурхна илгэсн Аврачиг – Христосиг олж аввидн!

⁴² Дэкэд тер ахан Исусур дахулж авч ирв. Исус Шимон тал хэлэжэхэд келв:

– Йохана көвүн Шимон эндр өдрэс авн Би чамд Кеп* гидг нер өгчөнөв.

Исус Пилипиг болн Натаналиг дууджана

⁴³ Маңһдуртнь Исус Һалилья тал йовхар шиидв. Тер Пилипиг олж авад:

– Намаг дахад йов! – гив.

⁴⁴ Пилип Бетсэд гидг хотна көвүн бээсмн. Тер хотн Андрейин болн Пётрин бас төрскн хотн бээж. ⁴⁵ Пилип Натаналиг олж авад терүнд:

– Бидн закана дегтрт Моше болн ээлдэчнр бичсн кү олж аввидн. Тер Назарет хотна Йосипин көвүн Исус бээж, – гиж келв.

⁴⁶ – Назаретас сэн юмн ирдви? – гиж Натаналь хэрүднь келв.

– Эврэн йовад хэлэ, – гиж терүнд Пилип келв.

⁴⁷ Исус аашсн Натаналиг үзэд:

– Эн йосн Израилин күн. Энүнэ седклд мек худл төрүц уга, – гиж келв.

⁴⁸ – Та намаг альдас меднэт? – гиж Натаналь өврж сурв.

– Чамаг дуудхас урд Би чамаг инжр модна сүүдрт суусичнь үзлэв, – гиж Исус хэрү өгв.

⁴⁹ – Багш, Та Бурхна Көвүнт. Та Израилин Хант! – гиж Натаналь келв.

⁵⁰ – Би чамаг инжр модна сүүдрт үзв гиснд чи нанд иткжэнэч. Зуг чи энүнэс ик өвэрц юм үзхич, – гиж Исус хэрү өгв.

⁵¹ – Би таднд үнэр келжэнэв, тадн заагрсн теңгрэс Күмни Көвүнүр бууж ирсн болн терүнэс деер өрггдсн Бурхна элчнриг үзхит, – гиж Исус немж келв.

* Эн нерн грек келнэс «чолун» – Пётр гиж орчулгдна.

Канад болсн хүрм

2 Хойр өдрин хөөн Һалильяд бээсн Кана гидг балһснд хүрм болж. Исусин экнь тенд бас бээж. ²Исусиг сурһульчнрта хамднь бас тер хүрмд дуудж. ³Гиичнр чаһран ууһад чилэхлэнь, Исусин экнь Терүнд келв:

– Чаһр дэжж уга.

⁴Исус эхдэн: – Аак, юнгад Та нанд энүнэ тускар келжэнэт? Мини цаг ирэд уга, – гиж хэрү өгв.

⁵Исусин экнь зарцнрт:

– Энүнэ келсинь кетн, – гив.

⁶Тенд зурһан ик чолун бүһш зогсжала. Еврей келн эмтн эврәннь йосар юм әрүслж уһахин төлә терүг бәрдг бээсмн. Бүһш болһнднь 80–120 литр ус багтдг бээж.

⁷– Сав болһниг дүүргэд ус кетн, – гиж Исус зарцнрт келв.

Тедн бүһшмуд дүүргэд ус кев. ⁸Исус:

– Ода эн савас ус утхж авад, хүрмин ахлачд авч одад өгтн, – гив.

Зарцнр келсинь күцэв. ⁹Хүрмин ахлач чаһрт хүврсн усиг амсв, тер чаһриг альдас авсинь медсн уга бээж, зуг һанцхн зарцнр медлэ. Хүрмин ахлач күргиг дуудж авад келв:

¹⁰– Эмтн сән һара чаһриг нәр эклхлэнь хүрмин гиичнрт өгнө. Цуһар согтж одхла, му чаһр һарһж өгнө. Чи болхла сән чаһриг ода күртл бәрэд суусмч?

¹¹Эн Исусин үзүлсн өвөрц йовдлмудын түрүнкнь бээсмн. Цуг эн йовдл Һалильяд бээсн Кана гидг балһснд учрсмн. Иигэд Исус эврәннь күчтә нерән туурулв, энүнэ хөөн сурһульчнр Терүнд икәр иткв. ¹²Цааранднь Исус сурһульчнртаһан Капернам хот темцж йовв. Исусин экнь, дүүнрнь Терүнлэ хамдан бас һарад йовцхав. Капернамд тедн цөөкн өдр бээв.

Һол сүмиг цеврлһн

¹³Евреймүдин Песах гидг нәр өөрдж йовсмн, тегэд Исус Ерусалим балһснур һарад йовв. ¹⁴Исус Ерусалимин сүм дотр бухмуд, хөд, көглжрһс хулдсн әмгиг үзв. Мөңг сольдг әмгиг чигн Тер үзв. Тедн ширән өөр сууцхаж. ¹⁵Тиигхлә Исус деесәр маля гүрэд, хөөдиг, бухмудыг көөһэд һарһв. Мөңг сольдг әмгнә ширәһинь хольврулад, теднә мөңгинь тараһад хайв.

¹⁶ – Эднэн авад цааран эрлгн! Мини Эцкин гериг хулд гү-
үлгэнэ герт бичэ хүврүлтн! – гиж Исус көглжрн хулджасн
эмтнд келв.

¹⁷ Энүг үзсн сурһульчнр, Бурхна Бичгт бээсн «Би тана герт
дуртав. Тер дурн дотрким шатажана» гисн үгмүдиг тодлж санв.

¹⁸ – Иигж кех йосн чамд бээхиг медүлхин кергт онц темдг
үзүл, – гиж евреймүдин толһачнр Исусин өмнэс келцхэв.

¹⁹ – Эн сүмиг хамхлад таратн, Би һурвн хонгин болзгт цуг
энүг хэрү тосххв, – гиж Исус хэрүднь келв.

²⁰ – Кезэнэ эн сүмиг дөчн зурһан жилдөн эмтн тосхсмн. Чи
болхла Энүг һурвн өдрин туршт босхахар седжэхмч? – гиж
евреймүдин толһачнр хэрүцв.

²¹ Исус болхла сүмин тускар келсн цагт Эврәннь цогцин
тускар келсмн. ²² Хөөннь Исус әмдрснэ хөөн Терүнэ сур-
һульчнр Исусин цуг эн үгиг тодлж санла. Тедн Бичгт болн Исус-
син келснд иткв.

Исус цуг әмтнә уха-седклинь меднә

²³ Исус Ерусалимд Песахин нәәрт бээсн цагтан өвәрц йовдл-
муд үзүлв. Тер учрар кесг әмтн Терүнд иткв. ²⁴ Зуг Исус теднд
икәр нәәлсмн уга, юнгад гихлә, Исус әмтиг сәәнәр меддг бәәж.
²⁵ Исус әмтнә дотрк уха-седклиг сәәнәр меддг бәәсмн. Тер уч-
рар Исуст күүнә тускар юм келх керг уга билә.

Исус болн Никодим хойр

3 Паршмуд заагт нег күн бәәж. Терүнә нерн Никодим. Тер
евреймүдин толһачнрин негнь бәәж. ² Нег дәкж Никодим
сөөһәр Исусур ирәд келв:

– Багш, Тана кесн өвәрциг нег чигн күн Бурхн угаһар кеж
чадшго билә. Тер учрар Таниг Бурхна илгәсн Багш болдгинь
бидн меднәвидн.

³ – Күн болһн шинәс әс төрхлә, Бурхна ориг үзж чадшго гиж
Би чамд үнәр келжәнәв, – гиж Исус хэрү өгв.

⁴ – Көгшн күн шинәс яһж төрхмб? Тер хойрдад эврәннь экин
геснд орад төрж һаршгоlm? – гиж Никодим Исуст келв.

⁵ – Һанцхн уснас төрснь, Сәкүснәс төрснь, Бурхна орнд тусж
чаджана гиж үнәр келжәнәв. ⁶ Цогц бийәс төрснь, цогц бий

болна. Һанцхн Сәкүснәс сәкүсн төрдг мөн. ⁷Шинәс төрх кергтә гисндм бичә өврәд бә. ⁸Салькн дурга һазртан шуугад кәдлнә. Чи терүнә шууга соңснач, зуг альдас һарад, альдаран темцж үләжәхинь медх арһ чамд уга. Сәкүснәс төрсн күн лавга тиим болна, – гиж Исус келв.

⁹– Тиим юмн яһж болхмб? – гиж Никодим сурв.

¹⁰– Чи Израиль әмтнә багш болнач, зуг цуг әнүг әс медхшлмч?
¹¹Үнәр келжәнәв, Бидн медсән келнәвидн. Бидн үзсән герчлнәвидн, зуг тадн Мана герчлһиг үнн гиж ухандан авхшит. ¹²Кемр орчлнгин юмна тускар келхлә, тадн нанд әс иткхлә, теңгрин юмна тускар келсн цагт яһж нанд иткхмт? ¹³Теңгрәс бууж ирсн Күмни Көвүнәс талдан күн Теңгрт бәәһәд уга. ¹⁴Моше кәдәд күрл моһаг модн деер өргсн кевәр Күмни Көвүн өрггдх зөвтә. ¹⁵Тегәд Нанд иткдг күн мөңк жирһл әдлх. ¹⁶Юңгад гихлә, Бурхн орчлнд дегд хәәртә болад, Исуст иткдг күн үкл уга, мөңк жирһл әдлтхә гиж ор һанцхн Көвүһән өгсн мөн. ¹⁷Көвүһәрн орчлнгин зарһ кех биш Көвүһәрн орчлнгиг харсж аврхин төлә Бурхн Терүг һазрур илгәсмн. ¹⁸Терүнд иткдг күн зарһла харһжахш, әс иткдг күн зарһла харһж. Яһад гихлә, тер Бурхна ор һанцхн Көвүнд итксн уга. ¹⁹Зарһнь иим: орчлнд герл тусж ирв. Зуг әмтн герлиг һолад, харһһуг таасж авсмн. Юңгад гихлә, теднә керг-үүлнә хар. ²⁰Хар үүл күцәдг күн герлд дурго, үүлнә герлд илдкх гиһәд, тер герләс зулна. ²¹Зуг үнн чикәр бәәснә герлүр ирнә. Бурхиг соңсад, цаһан үүлинә күцәсинә герл үзүлх гиһәд тер тиигнә, – гиж Исус келв.

Исус уснд кирслдг Йохан хойр

²²Әнүнә хөөн Исус әврәннә сурһульчнрла Йудья һазрур йовв. Тенд бәәжәһәд, Исус әмтиг уснд кирслдг бәәсмн. ²³Йохан тер цагт Шалим балһсна өөр Анон гидг һазрт бас әмтиг уснд кирслв. Юңгад гихлә, тер һазрт дала усн бәәж. Әмтн Йоханар бийән уснд кирслүлхәр ирдг бәәсмн. ²⁴Йоханыг түүрмд суулһхин өмн цуг ән учрсн бәәж. ²⁵Йохана сурһульчнрин болн евреймүдин хоорнд усар әрүслһнә хуучн авъясын тускар зүткдән болв. ²⁶Тедн Йоханур ирәд:

– Багш, урднә Йордана һолын телтр көвәд танга нег күн бәәлә. Та Терүнә тускар әмтнд келсн биләт. Ода тер әврән әмтиг уснд кирслнә. Цугтан Терүн тал ирнә, – гиж келцхәв.

²⁷ – Күн теңгр заяж келсэр кергэн күцэж чаджана, – гиж Йохан хэрү өгв.

²⁸ – Би Бурхна илгэсн Аврач бишв, зуг би Терүнэ өмн йовхин төлө илгэгдлэв, – гиж Мини келсн үгмүдин герчнр тадн эврэн боллат. ²⁹ Хэрд харчасн күүктэ көвүн күргн болна. Күргнэ үр күргиг сонсад зогсна. Терүнэ ду сонсад, үрнь байрлна. Тиигж би ик байрта бээнэв. ³⁰ Терүнэ чинрнь өсж өрггдх зөвтө, мини цаг болхла чилж йовна, – гиж Йохан келв.

Теңгрэс бууж ирснь

³¹ Теңгрэс бууж ирснь һазр деерк эмтнэс деер. Һазрин үрн болхла һазрин үлмэд бээнэ, һазрин тускар келнэ. Зуг Теңгрэс бууж ирснь Һазрин эмтнэс деер! ³² Тер Эврэннь үзсэн, сонссан герчлнэ. Зуг эмтн Терүнэ келснд иткхш. ³³ Терүнэ герчллһ седк-лдэн авсн эмтн энүгэрн Бурхн – йосн үнн гиж лавта үзүлнэ. ³⁴ Бурхна илгэсн күн Бурхна үгмүдэр келнэ. Юнгад гихлэ, Бурхн Терүг Сәкүсэрн дүүргнэ. ³⁵ Эцк Көвүндэн дегд хээртэ болад, цугинь һартнь бөрүлв. ³⁶ Көвүнднь иткдг күн мөнк жирһл эдлнэ. Көвүнэ үгинь эс сонсснь мөнк жирһл үзшго. Бурхна цааж терүнэ толһа деер буув.

Исус болн Шамарья күүкд күн

4 ¹⁻² Йоханур ирдг сурһульчнрас тооһарн даву ик сурһульчнр Исусур ирэд, уснд кирслгджәнэ гидг зэнг паршмуд медчкв. (Үнэртнь болхла, Исус эврэн эмтиг уснд кирслдго бөөж, Терүнэ сурһульчнр эмтиг уснд кирслдг бөөж.) ³ Исус энүнэ тускар сонсад, Йудья һазриг үлдөһөд, хэрү Һалилья тал йовсмн. ⁴ Һалилья тал йовж йовад, Исус зууран Шамарья һазриг дэврж һарла. ⁵ Тегэд Исус Шамарья һазрт бөөсн Сухар гидг хотнур орж ирв. Кезәнэ Яков Йосип гидг көвүндэн нег һазр өгсн бөөж. Тер һазрин өөр Сухар гидг хотн бөөж. ⁶ Тенд Яковин нертэ худг бөөж. Исус хаалһдан муурад, тер худгин өөр ирэд сууһад амрв. Удин цаг өөрдж йовла. ⁷ Нег Шамарья күүкд күн тер худгур ус авхар ирж.

– Нанд уух ус өгич, – гиж Исус сурв.

⁸ Сурһульчнр болхла тер цагт хот хулдж авхар, өөрк хотнур йовж одсн бөөж.

⁹ – Та, еврей күн, нанас Шамарья күүкд күүнэс уух ус сурдмт? – гиж Шамарья күүкд күн Исусас сурв.

(Тер юнгад гихлэ, евреймүд Шамарья эмтнлэ төрүц дуһардго, хэрлцдго бээсмн.)

¹⁰ – Кемр Бурхн эмтнд ю белглжэхинь, Кен чамас уух ус сур- жахинь чи медсн болхла, эврэн Нанас ус сурх билэч, болв Би чамд эмд ус өгх билэв, – гиж Исус хэрү өгв.

¹¹ – Ах Нойн минь, Та суулһ угат, худгтн болхла гүн. Эмд ус яһж авч чадхмт? ¹² Та мана өвк эцк Яковас деер болвзгот? Тертн маднд эн худг өгсн билэ, болв бийнь эврэннь үрн-садта- нан, малтаһан энүнэс ус уудг бээсмн! – гиж күүкд күн хэрүднь келв.

¹³ – Кен чигн эн уснас уухла, дэкэд ундасх. ¹⁴ Зуг Мини өгсн уснас ууснь төрүц ундасшго. Юнгад гихлэ, Мини өгсн усн күү- нэ дотр мөнк жирһл өгдг булгт хүврх, – гиж Исус үгинь сонч- кад келв.

¹⁵ Тиигхлэ күүкд күн келв:

– Ах Нойн минь, намаг хөөннь ундасдгоһар, эн худгур дэкж ирдгоһар тер уснаһн өгит, – гив.

¹⁶ – Гер талан йовад, эврэннь залуһан нааран дахулж авч ир, – гиж Исус хэрүднь келв.

¹⁷ – Би залу угав, – гиж күүкд күн хэрүцв.

– Чи үнөр келвч. Чи залу угач. ¹⁸ Чи тавн залута билэч. Чи үнөр келвч. Ода чамла хамдан бээһн залу күн, чини залу биш, – гиж Исус келв.

¹⁹ – Ах Нойн минь, би үзжәнэв, Та әәлдәчд. ²⁰ Мана өвк эцкнр эн уулур ирәд, Бурхнд сөгдж зальврдг билэ. Зуг тадн, ев- реймүд, Ерусалимд ирәд сөгдж мөргх кергтә гиж тоолнат, – гиж күүкд күн келв.

²¹ – Эгч, итк Нанд. Тиим цаг иржәнә: эн уул деер биш, Еру- салимд биш, тадн Мана Эцкд сөгдж мөргхит! ²² Тадн Шамарья эмтн юундан мөргжәхән эврән меджәхшит. Бидн болхла кенд сөгджәхән йосндан меднәвидн. Юнгад гихлэ, Бурхн евреймү- дәр дамжад әмтиг килнцәһн аврх. ²³ Зуг цагнь өөрдж йовна. Цагнь лавта өөрдж ирв! Эн цагт Бурхнд йосндан сөгддг арһ Бурхна Сәкүһн әмтнд өгх. Бурхнд тиим сөгдәчнр кергтә. ²⁴ Бурхн гисн – Сәкүһн. Терүнд сөгдсн улс Сәкүһәр дамжж

* Евреймүд Шамарья улсин савинь чигн олзлдго бәәж.

деерэс төрх зөвтэ. Тиим эмтн Эцкд йосндан сөгдх, – гиж Исус хэрүднь келв.

²⁵– Бурхна илгэсн Аврач аашна гисинь би меднэв (Бурхна илгэсн Аврач – Христос). Тер ирхлэрн, маднд цугинь цөөлж өгх, – гиж күүкд күн келв.

²⁶ Исус:

– Би, чамла күүнджэсн күн, Бурхна илгэсн Аврачв, – гив.

²⁷ Тер алднд сурһульчнр хэрү ирцхэв. Исусиг күүкд күүнлэ күүнджэхинь үзэд, цуһар алң болцхав. Зуг нег чигн күн яһад терүнлэ күүндвт гиж сурсн уга. ²⁸ Күүкд күн эврәннь буһшан худгин өөр үлдэһэд, хотн тал йовад эмтнд келв:

²⁹– Наартн, шулуһар йовтн, тадн мини жирһл бөөдлин тускар келж өгсн күүг үзхит. Тер Бурхна илгэсн Аврач болвзго? – гив.

³⁰ Эмтн хотнас һарад, Исусур йовцхав. ³¹ Тер цагт Терүнэ сурһульчнр:

– Багш, буйн болтха, хотан уутн, – гив.

³² Зуг Тер:

– Нанд тиим хот бөөнэ, тер хот ямаранынь тадн медхшт, – гиж келв.

³³ Тиигхлэ сурһульчнр:

– Талдан күн Терүнд хот авч ирсн болвза? – гиж хоорндан күүндцхэв.

³⁴ Мини хот гисн – Намаг Илгэснэ таалыг күцэһэд, Нанд да-алһсн көдлмшиг күцэһэд төгсэх. ³⁵ Кеер тэрэ тэрсн цагт: дөрвн сар болчкад, урһцан хурах цаг ирх, гиж тадн келнэт, тиим эсий? Тегэд Би таднд келжэнэв: сөөнэр хэлэтн! Тэрсн тэрэн хурахд белн. ³⁶ Тэрэ хадх күн келстэ олзан ода авчана. Мөңк жирһлин төлэ урһцан хуражана. Тегэд тэрснь чигн, хадснь чигн хамдан байрлх. ³⁷ Негнь тэрнэ, дарукнь хадна гидгнь лавта батлгджана. ³⁸ Тегэд Би тадниг көлсөн өгч эс көдлсн юмиг хадж хуратн гиж илгэжэнэв. Тенд талдан эмтн көлсөн өгч көдлэ. Тадн болхла теднэ көдлмшт орлцад, урһцинь хуражанат, – гиж Исус үгэн төгсэв.

³⁹– Мини кезэнэ кесн юмиг Тер келж өгв, – гиж күүкд күн эмтнд келсн.

Тер учрар тер хотнд бөөсн кесг Шамарья улс Исуст иткдг болв. ⁴⁰ Шамарья эмтн Исусур ирэд:

– Буйн болтха, маднла үлдтн! – гиж сурв. Тегэд Тер теднлэ хойр өдр бөөв. ⁴¹ Дөкэд кесг эмтн Исусин келсн үгд иткв.

⁴² – Түрүлөд бидн чини келсиг сонсад итквидн. Ода болхла бидн Терүнд бийдн иткжәнөвидн, тер юнгад гихлө, бидн эврәнн чикәрн Терүг сонсвидн. Эн Күн орчлңгин Аврач гиж бидн йосндан иткжәнөвидн, – гиж тедн тер күүкд күүнд келцхөв.

Исус ямта күүнэ көвүг эдгэсн

⁴³ Хойр өдр давхла Исус Һалилья һазруп һарад йовв. ⁴⁴ Тер юнгад гихлө, әәлдәчиг төрскн орн-нутгтн күндлхш, – гиж урдн Исус эврән келсмн. ⁴⁵ Исус Һалильяд ирхлө, тер һазрин әмтн байртаһар Исусиг тосв. Тер әмтн Ерусалимд Песахин нә-әрт Исусин кесн өвәрциг бас үзлө. ⁴⁶ Дәкәд Исус Һалильян Кана гидг хотнур һарад йовв. Урдн тенд Исус усиг чаһр кесмн. Тер цагт Капернамд хаана нег ямта күн бәәдг бәәсмн. Терүнә көвүн өнгрхин өмн өргнд бәәж. ⁴⁷ Исусиг Йудья һазрас Һалильяд ирсинь сонсад, тер ямта күн Исусиг олж авад:

– Капернамд ирәд, мини көвүһим эдгәһит, тер үкн гижәнә, – гиж Терүг эрәд сурв.

⁴⁸ – Онц темдгүд Нанас үзлгө, тадн иткхн угат! – гиж Исус терүнд келв.

⁴⁹ – Ах Нойн, мини үрн үкәд уга бәәтл шулуһар манаһур ирит! – гиж хаана ямта күн сурв.

⁵⁰ – Хәр, герүрн йов. Чини көвүнчн әмд үлдх, – гиж Исус келв.

Тер күн Исусин үгд иткәд, герүрн йовв. ⁵¹ Төрскн хотнурн йовж йовад, тер күн зууран эврәнн зарцнрлаһан харһв.

– Тана үрнтн эрүл-менд бәәнә, – гиж тедн келв.

⁵² – Кезә көвүм сән болв? – гиж тер зарцнрас сурв.

– Өцклдүр үдлө нег часла халунь уурв, – гиж тедн хәрү өгв.

⁵³ Көвүнчн әмд үлдх гисн Исусин үгин хөөн көвүн эдгсинь эцкн медв. Энүнә хөөн тер эврәнн гер-бүлтәһән, зарцнртаһан Исуст иткв. ⁵⁴ Тиигәд Йудьяс ирсәнн хөөн Исус Һалильяд бәәһәд хойрдгч темдг үзүлв.

Бәтсат гидг бийән уһадг бәәрнд кү эдгәһн

5 Удл уга еврей әмтнә нәр болв, тер учрар Исус Ерусалимур йовв. ² Ерусалимд «Хөөнә үүдн» гидг ормин өөр еврей келәр Бәтсәд гидг бийән уһадг бәәрн бәәж. Тенд тав дәкж зергләд зогссн бахнс бәәсмн. ³ Кесг гемтә, сохр, доһлң болн тәкрсн һар-көлтә

эмтн тенд бас кевтж. ⁵Һучн нээмн жилдэн өвчтэ нег күн эмтнэ заагт кевтж. ⁶Исус терүг үзэд, кесгтэн гемнжэхинь медэд:

– Чи эдгхэр седжэнчи? – гиж сурв.

⁷Өвчтэ күн хэрүднь:

– Ах Нойн, усн көндрсн цагт уснд орхар седхлэ, нанд нөкд болдг күн уга. Намаг уснур эврэн өөрдхэр седхлэ, күн мини өмнөһүр орж одна, – гив.

⁸Тиигхлэ Исус терүнд:

– Бос! Девскрэн авад йов! – гив.

⁹Агчмд тер күн эдгэд, эрүл-менд болж одв. Тер эврэннь девскрэн авад эклэд йовв. Цуг эн бемб өдрлэ болв. ¹⁰Тер учрар евреймүдин толһачнр эдгсн күүнд:

– Эндр бемб өдр, мана закаһар чи эврэннь девскрэн зөөж авч йовх зөв угач, – гив.

¹¹– Намаг эдгэсн күн: «Эврэннь девскрэн авад йов» гихэд нанд келлэ, – гиж тер хэрү өгв.

¹²– Девскрэн авад йов гисн күн кен гидг күмб? – гиж тедн сурцхав.

¹³Эдгсн күн Терүг кенинь эврэн медсн уга билэ, юнҗад гихлэ, Исус олна заагт орад, тер даруны йовж одв. ¹⁴Хөөннь Исус тер күүг сүмд үзэд:

– Ода чи эрүл-менд болвч. Энүнэс хооран му юмн чамла учршгон төлэд дэкж килнц бичэ ке, – гиж келв.

¹⁵Тер күн дэкэд евреймүдин толһачнр тал йовад:

– Намаг Исус эдгэв, – гив.

¹⁶Исус бемб өдрлэ кү эдгэсн учрар евреймүдин толһачнр Исусиг көөдг болв.

¹⁷– Эцкм оньдин көдінэ, тегэд чигн Би бас көдлх зөвтэв, – гиж Исус келв.

¹⁸Тиигхлэ евреймүдин толһачнр Исусиг алх цаг улм шунж хэ-эцхэв. Тер юнҗад гихлэ, Исус һанцхн бемб өдрин йосиг эвдсн биш, дэкэд Бурхиг «Мини Эцкм» гихэд Бийән Бурхнла эдл-цүлсмн.

Бурхна өгсн йосн-күчн Исуст бээнэ

¹⁹Исус евреймүдин толһачнрт иигж келв:

– Үнэр таднд келжэнэв: Эцкиннь кесн юмиг эс үзтл, Көвүн эврэ санаһарн юм кеж чадшго. Эцкиннь кежэх көдлмшиг Көвүн

кенэ. ²⁰Эцк көвүндэн хээртэ болад, кежэх кергэн Көвүндэн даалһж үзүлнэ. Тер энүнэс ик үүл үзүлх. Тегэд тадн икэр өвр-хит. ²¹Эцк үксн эмтиг үкэрэснь босхж эм орулдгла эдлэр Көвүнь дурта күүнд эм орулна. ²²⁻²³Эцк эмтнэ зарһинь кехш. Көвүһинь Эцклэ эдл күндлэд, тевчтхэ гihэд, Тер Көвүндэн эмтнэ зарһ кех йос даалһж өгв. Көвүг эс тевчдг күн, Терүг илгэсн Эцкиг чигн тевчхш. ²⁴Үнэр таднд келжэнэв: Мини Үгим сонсад, Намаг Илгэсн Эцкдм иткснь мөнк жирһл эдлх. Тер күн зарһла харһшго. Тер үклэс һарад, эмн жирһл эдлж. ²⁵Үнэр келжэнэв: цагнь өөрдж йовна, цагнь лавта ирв! Үксн эмтн Бурхна Көвүнэ дууһинь соңсх. Болв Терүг соңссн эмтн эмдрэд жирһлэн эдлх. ²⁶Эцк эмн жирһлин булг болдг эдлэр Көвүндэн эмн жирһлин булг болх арһ өгв. ²⁷Тегэд чигн Бурхн Көвүндэн Зарһч болх йос өгв. Юнгад гихлэ, Терүнэ Көвүн – Күмни Көвүн. ²⁸Бичэ энүнд өвртн. Юнгад гихлэ, цагнь өөрдж йовна, үкэрт кевтсн, үксн эмтн Күмни Көвүнэ ду сонсад, үкэрэсн босж ирх. ²⁹Сэ кедгнь мөнк жирһл эдлхэр эмдрж босх. Му кедгнь зарһла харһулгдхин төлэ эмдрж босх. ³⁰Би эврэннь йосарн юм күцэж чадхшв. Би Бурхна келсэр зарһинь кежэнэв. Мини зарһм үнн чик, юнгад гихлэ, Би эврэннь санан-седвэриг күцэхэр шунжахшв. Намаг илгэсн Эцкин санан-седвэриг күцэхэр шунжанав.

Исусин тускар герчлһн

³¹– Кедр Би эврэн Бийиннь тускар герчлсн болхла Мини үгд үнн уга. ³²Зуг Мини тускар келдг дэкэд герч бөөнэ. Би меднэв: Терүнэ Үгнь йосн үнн. ³³Тадн Йоханур эмтиг илгэлэт. Тер Мини тускар үн келв. ³⁴Күүнэ герчлһн Нанд юмн биш болвчн, зуг тадниг аврулхин төлэ Би энүг келжэнэв. ³⁵Йохан герл өгдг шатжах шам мет бээсмн. Тадн болхла цаг зуур терүнэ герл авад, герлин толянд байрлхар седлэт. ³⁶Зуг Би Йоханас даву ик герчтэв. Эцкм Нанд даалһж өгсн олн керг-үүл Би күцэжэнэв. Эн олн керг-үүл Эцкм Намаг илгэсинь герчлжэнэ. ³⁷Намаг илгэсн Эцкм Мини тускар бас герчлжэнэ. Терүнэ ду тадн төрүц сонсад угат. Терүнэ дүр тадн төрүц үзэд угат. ³⁸Тегэдчн тадн Терүнэ үг зүркндэн хадһлж бэрхшит. Тер Намаг илгэж гиснд тадн иткжэхшит. ³⁹Тадн Бурхна Бичг дасж умшнат. Энүгэр мөнк жирһл эдлхит гиж саннат. Зуг тенд Мини тускар бичэтэ! ⁴⁰Тер бийнь тадн мөнк жирһл эдлхин төлэ Нан тал ирхэр седжэхшит.

⁴¹Эмтнэ магтал нанд керго. ⁴²Зуг тадниг Бурхнд дурго болдгиг Би меднэв. ⁴³Би тадн тал Эцкиннь нерн деерэс ирв. Тадн Нанд оньган өгчэхшит. Эврэннь нерн деерэс хэр күн ирхлэ, тадн терүнд оньган өгнэт. ⁴⁴Яһж тадн Намаг иткж чадхмт? Тадн иткж чадшгот. Учрнь иим: тадн нег-негнәннь буульмж магталыг таасж ик чинрт тоолнат. Зуг ор һанцхн Бурхна магталыг авхар икэр хээжэхшит? ⁴⁵Намаг Эцкиннь өмн тадниг гемшэхэр ирж гихэд бичэ сантн. Тадна нөөлжэсн Моше тадниг гемшэх. ⁴⁶Кемр тадн Мошед итксн болхла, тадн Нанд чигн иткх билэт. Юнгад гихлэ, тер Мини тускар бичлэ. ⁴⁷Зуг кемр тадн терүнэ бичснд эс иткхлэ, Мини келсн үгд яһж иткхмт?

Тавн миңһн күцадхлһн

6 Энүнэ хөөн Исус Һалилья (талданар келхд, Тиберэд) нуурин телтр көвэ тал һарад йовв. ²Терүнэ ардас кесг эмтн дахж йовцхав, тер юнгад гихлэ, гемтэ эмтиг эдгэж, ямаран өвөрц юм Исус кесинь тедн үзлэ. ³Исус уул деер һарад, тенд сурһульчһртаһан суув. ⁴Еврей эмтнэ Песах гидг нэр өөрдж йовла. ⁵Исус эргндэн хэләһэд, кесг эмтиг аашсинь үзэд, Пилипд келв:

– Эн эмтиг цадххин төлө альдас тиим дала өдмг хулдж авхмб?

⁶Исус Пилипиг яһна гилч гиж сурв, бийнь болхла эврэн ю кехән меджәлэ.

⁷– Күн болһнд бичкн өдмгин тасрха өгхин төлө маднд бүкл сардан көдлэд мөңг шингэх кергтә, – гиж Пилип хэрү өгв.

⁸Талдан нег Андрей гидг нертә сурһульч, Симон Пётрин дү:

⁹– Энд тавн ичмән өдмгтә болн хойрхн заһста нег көвүн бөөнә. Зуг цуг эн тиим олн күүнд дегд бичкн хот болжана, – гиж Исуст келв.

¹⁰– Цуг эмтиг суулһ, – гиж Исус келв.

Теднэ бөөсн һазрт дала ноһан бөөж, эмтн тер ноһан деер сууцхав. Тооһарн тедн тавн миңһн бөөж. ¹¹Тегэд Исус өдмг авад, Бурхиг магтад, тер өдмгиг хуһлад, суусн эмтнд хуваһад өгв. Тиим кевәр Тер заһсиг бас хуваһад, эмтнд түгэж өгв. ¹²Эмтн хотан идэд цадсн хөөн Исус:

– Цуг үлдсн хотыг үрәшгоһар цуглулж автн, – гиж сурһульчһртан келв.

¹³Эмтн эклэд хотан идсн цагт тавхн ичмэн өдмг бээж, зуг сурхульчнр хотын үдл цуглуулхлa, тернь хулсар гүрсн арвн хойр савд багтв.

¹⁴— Эн күн орчлнд ирх Ээлдэч, — гиж эмтн Исусин кесн өвэрциг үзснэ хөөн келв.

¹⁵Исус эмтиг цуглрад, Терүг авад хаана ширэд суулххар сед-жөхинь медэд, ханцарн үлдхэр уул темцж һарад йовж одв.

Исус усн деегүр йовжана

¹⁶Асхн болхла, Терүнэ сурхульчнр уулас нур тал бууһад йовц-хав. ¹⁷Тедн оңһц дотр орад, нур һатлад, Капернам гидг балһс-нур йовцхав. Харһурсн цаг билэ, зуг Исус хэрү ирсн уга. ¹⁸Ик салькнас көлтэ нуурин дольган буслад, деврэд, усн ормасн һарн гив. ¹⁹Тавн-зурһан дуунад сурхульчнр оңһцар усч йовхла, генткн нуурин усн деегүр Исусиг теднэ оңһц тал йовж йовхинь үзв, тедн дегд икэр ээцхэв.

²⁰— Энтн бив. Бичэ ээтн, — гиж Исус теднд келв.

²¹Тедн Исусиг оңһц дотр орулхар седхлэ, оңһц тер алднд дарунь кергтэ усна көвэд ирэд зогсв.

Исус — амн-жирһлин хот

²²Маңһдуртнь нуурин телтр көвэд цуглрсн эмтн негхн оңһц бээсинь үзв. Исусиг оңһц дотр эс орсинь, сурхульчнр Терүн угаһар йовсинь эмтн медв. ²³Талдан оңһцс Тиберэдэс нег һазрур ирв. Тер һазрт урднь Исус Бурхиг магтж, өдмг эмтнд өгэд цад-хасн билэ. ²⁴Исусиг болн терүнэ сурхульчнриг тенд олж чадлго тедн оңһцсд сууһад Исусиг хөөһэд, Капернам балһснур темцж йовцхав. ²⁵Нуурин телтр көвэд Исусиг олж авад тедн:

— Багш, Та кезэ нааран ирвт? — гиж сурцхав.

²⁶— Тадн онц темдг үзсн төлөд намаг хээжэхшит, зуг өдмг идж цадсндан хээжэнэт гиж Би үнэр келжэнэв. ²⁷Дарунь үрж оддг хотын төлө бичэ көдлэд бээтн, зуг төрүц үрдго мөнк жирһл өгдг хотын төлө көдлж бээтн. Эн хотыг Күмни Көвүн танд өгчэнэ. Яһад гихлэ, Тер Бурхн Эцкин онц темдгтэ, — гиж Исус хэрүднь келв.

²⁸— Бурхна керг-үүлмүд күцэхин төлө бидн ю кех зөвтэвидн? — гиж тедн сурцхав.

²⁹ – Бурхна керг-үүл күцэх гиснь – Бурхна илгэсн күүнд иткх гисн үг, – гиж Исус хэрү өгв.

³⁰ – Мадниг Танд итктхэ гihэд Та ямаран өвөрц юм үзүлж чадхвт? Терүг үзэд бидн иткх билэвидн. Ямаран кергиг кү-цэхвт? – гиж эмтн хэрүднь сурцхав.

³¹ – Мана өвк-эцкнр кедэ һазрт «манна» гидг хот иддг бэ-эсмн. Энүнэ тускар Бурхна Бичгт иигж бичетэ: «Идх өдмг Бурхн теднд тенгрэс өглэ», – гицхэв.

³² – Моше биш Мини Эцкм таднд йосн өдмг тенгрэс белгл-жэнэ. ³³ Эн Бурхна өдмг тенгрэс бууж ирэд, күмн эмтнд жирһл өгнэ, – гиж Исус эмтнд келв.

³⁴ – Деед Эзн! Эн өдмгиг маднд оньдиндан өгч белглич! – гиж тедн келцхэв.

³⁵ – Би эмн жирһлин өдмгв. Нан тал ирсн күн төрүц өлсш уга. Нанд иткжэх күн төрүц ундасш уга. ³⁶ Зуг Би таднд урднь келлэв: Тадн Намаг үзв чигн иткшгот! ³⁷ Болв Эцкинм өгсн улс Нан тал цугтан ирх. Иржэх күүг Би төрүц көөш угав. ³⁸ Юнгад гихлэ, Эврәннь күсл күцэхэр биш Бийм илгэсн Эцкин күсл кү-цэхэр Би тенгрэс бууж ирлэв. ³⁹ Намаг илгэсн Эцкин күсл иим: Нанд даалһсн эмтиг нег чигн кү геелго цугинь сүл өдрт эмдрүлхв. ⁴⁰ Мини Эцкин күсл эн: Бурхна Көвүг үздг, Терүнд иткдг күн болһн мөнк жирһлтэ болх зөвтэ. Сүл өдрт Би тедниг эмдрүлхв.

⁴¹ Терүг: Би тенгрэс буусн өдмг гисинь сонсад, евреймүд Исуст дурго болад һундлан келсмн.

⁴² – Эн Йосипин көвүн Исус биший? Бидн энүнэ эк-эцкинь меднэвидн, тиим эсий? Ода юнгад эн тенгрэс бууж ирв гihэд бөөдмб? – гиж тедн келцхэв.

⁴³ – Бичэ һундл өргтн, – гиж Исус келв.

⁴⁴ – Намаг илгэсн Эцк угаһар, Нег чигн күн Нан тал ирж чадшго. Сүл өдрт Би тер күүг эмдрүлхв. ⁴⁵ Бурхн күн болһниг дасхх гиж ээлдэчнр бичж. Эцким сонсад, Терүнэ ном авч дассн күн Нан тал ирнэ. ⁴⁶ Эцкиг күн үзв гиж би келжэхшв. Бурхнас ирсн һанцхн Тер Эцкиг үзсн мөн. ⁴⁷ Иткдг күн мөнк жирһл эдлнэ. ⁴⁸ Би – эмн-жирһлин өдмгв. ⁴⁹ Тана өвк экцнр кедэд «манна» гидг хот идсн бийнь цуһар өнгрж одла. ⁵⁰ Тенгрэс ирсн өдмг онц йилһрнэ. Энүг эдлсн күн төрүц үкш уга. ⁵¹ Би тенгрэс ирсн эмд өдмгв. Эн өдмгиг эдлсн күн мөнк

жирһлтэ болх. Эн өдмг – Мини цогц-махмуд. Эн махмудан Би орчлңгин эмн жирһлин төлө өгхв.

⁵² – Эврәннь махмудан идтхэ гиж маднд тер яһж өгхмб? – гиж евреймүд заагт зүтклдэн болв.

⁵³ – Үнэр келжәнэв. Кемр тадн Күмни Көвүнэ махмудын эс эдлхлэ, Терүнэ цусинь эс уухла, бий дотран эмн жирһл уга бөөхит. ⁵⁴ Махмудм эдлсн күн, цусим уусн күн мөңк жирһлтэ болна. Сүл өдрт Би терүг эмдрүлхв. ⁵⁵ Юңгад гихлэ, цогц бийим – йосн хот. Мини цусм – йосн ундн. ⁵⁶ Мини цогц бийиг эдлдгнь, Мини цусиг уудгнь Нанла негдэд бөөнэ. Би терүнлэ негдэд бөөнэв. ⁵⁷ Би эм өгчэх Эцкин илгэсн күмб. Тер Нанд жирһл өгчөнэ. Цогц бийим эдлжэх күүнд Би тиигж жирһл өгхв. ⁵⁸ Эн теңгрэс бууж ирсн өдмг мөн. Эн тана эцкнр идсн манна гидг хот биш. Тедн идсн бийнь өңгрж одла. Зуг эн өдмг эдлжэх күн мөңкиндэн бөөх, – гиж Исус теднд цөөлж келв.

⁵⁹ Исус Капернам хотнд евреймүдин хурлд эмтиг сурһжасн цагт келсмн.

Мөңк жирһлин туск үг

⁶⁰ – Эн ном дегд кецү. Кен энүг соңсж чадхмб? – гийһэд Исусиг соңссн эмтнэ кесгнь келцхэв.

⁶¹ – Эн ном таднд харш болжану? – гиж Исус сурһульчнриг хэрүцжэхинь медэд келв.

⁶² – Күмни Көвүг урднь бөөсн орн-нутгурнь хэрү өөд болж ниссинь үзэд тадн ю келхмт? ⁶³ Бурхна Сәкүсн эм өгнэ, күүнэ чидл олз өгхш. Мини келсн үг эм жирһл өгдг Сәкүсәр дүүргнэ. ⁶⁴ Зуг тадна зәрмнь иткжэхш. (Исус Терүнд эс иткх болн хөөтндэн урвх күүнэ тускар урдаснь медлэ.) ⁶⁵ Кемр Эцкм күүнд зая эс хээрлсн болхла, тер Нанур ирж чадшго. Терүнэ тускар Би таднд келлэв, – гиж цааранднь Исус келв.

⁶⁶ Эн үгмүдин хөөн сурһульчнрас кесгнь Терүг үлдәһэд хэрү йовж одв, дәкж тедн Исусиг дахсн уга.

⁶⁷ – Тадн Намаг бас үлдэх санатавт? – гиж Исус арвн хойр сурһульчнрасн сурв.

⁶⁸ – Деед Эзн минь, бидн кен тал йовхмб? Мөңк жирһл өгдг үгмүд Танд бөөнэ. ⁶⁹ Та Бурхнас ирсин гидгиг бидн медж итклэвидн, – гиж Шимон Пётр хэрү өгв.

⁷⁰ – Тадниг, арвн хойр кү Би йилж эс авлу? Зуг тадна заагас негнтн – эрлг! – гиж Исус келв.

⁷¹ Тер Шимон Йуда Искериотин тускар келж. Тер арвн хойрин негнь болсн бийнь, зуг хөөннь Исусас урвж.

Исус болн Терүнэ дүүнр

7 Энүнэ хөөн Исус Һалилья һазр эргэд йовж йовла. Еврей-мүдин толһачнр Терүг алх арһ хөөсн төлөд Исус Йудья һазриг эргж йовхар седсн уга. ² Сегмүд гидг евреймүдин нэр өөрдж йовла*.

³ – Эн һазриг үлдэхэд, Йудья һазр темцж байр-нээрт йов. Тенд сурһульчнр Чини кежэх өвөрц йовдлмуд үзх. ⁴ Эврәннь кесн үүлэн нуухмн биш, эмтнд медүлхин төлө терүгэн үзүлх кергтэ. Бээсэн олн эмтнд үзүл, – гиж Исусин дүүнр Терүнд келцхэв.

⁵ Исусин дүүнр чигн Терүнд иткдго бөөж.

⁶ – Зөвтэ цаг Нанд ирэд уга. Таднд болла ямаран чигн цаг амр. ⁷ Таднд орчлң дурго болж чадшго. Тедн Нанд дурго. Тер юнгад гихлэ, Би теднэ хар йовдлмуд илдкж герчлнэв. ⁸ Тер нээрт тадн эврэн йовтн, Би тиигэрэн йовшгов, Мини цаг ирэд уга, – гиж Исус хэрүднь келв.

⁹ Тиигж келэд Тер Һалильяд үлдв.

Исус сегмүд гидг нээрт

¹⁰ Терүнэ дүүнр нээрт йовцхав. Тедниг йовсна хөөн Исус Бийән медүллго нууцар бас тиигэрэн йовв. ¹¹ Евреймүдин толһачнр нээрт ирэд:

– Тер күн яһсмб? – гихэд Исусиг хээцхэв.

¹² Терүнэ тускар эмтн кесгтэн шимлдж күүндцхэв. Зэрмнь:

– Тер сән күн, – гиж келв.

Зэрмнь:

– Уга, тер эмтиг меклжэнэ, – гив.

¹³ Зуг цуһар евреймүдин толһачнрас эәһэд, Терүнэ тускар күн илэр келсн уга. ¹⁴ Нээрин өрөлнь давсна хөөн Исус сүмд ирэд эклэд эмтиг сурһв. ¹⁵ Евреймүдин толһачнр өврэд:

* Евреймүд кэдэ һазрт бээсн цагиг тодлад, һаха сар чилж йовхла, хуһн сар эклхд эн нэр нээмн өдрт темдглсн бөөж.

– Эн күн альдас тиим дала юм меддг болхв? Энтн сурһуль дасдг уга билэлм? – гиж нег-негнэсн сурцхав.

¹⁶– Эн ном Мини биш, Намаг илгэсн Бурхна ном. ¹⁷Терүнэ таалыг күцэхэр седснь эн номиг Бурхнас эс гиж Бийэсм хар-чахиг лавта медх. ¹⁸Эврәннь нернэс келжэхнь эврәннь нерэн дуудулхар шунна. Зуг Илгэснэ нериг дуудулхар шунж йовсн күн йосн үн келнэ. Түүнд худл уга. ¹⁹Таднд Моше закан өгсн биший? Зуг таднас негн чигн күн тер закаг күцэжэхш. Тадн юнгад Намаг алхар седжэхмт? – гиж Исус сурв.

²⁰– Чи хар сәкүстәч. Кен Чамаг алхар седжэхмб? – гиж әмтн хәрүцв.

²¹– Би негхн өвәрц үзүлв. Тадн цуһар алң болжанат. ²²Моше болхла, таднд әмн бийин үзүрин керчлһнэ авъяс өгв. Тер авъяс түрүлэд Мошеһәс биш өвк-эцкнрәс ирв. Тегәд тадн бемб өдрлэ нилх көвүдин әмн бийин үзүр керчнәт. ²³Кемр Мошен закаг әвдшгоһар тадн бемб өдрлэ нилхдин әмн бийин үзүринь керчдг болхла, Намаг бемб өдрлэ күүнә бий цогциг эдгәв гихәд юнгад тадн уурлжахмбт? ²⁴Өнг-зүсәрнь кү бичә гемшәтн. Үнн чикәр кү гемшәтн, – гиж Исус хәрүднһ келв.

Бурхна илгэсн Аврач кемб?

²⁵Тер цагт Ерусалимд бәәдг зәрм әмтн:

– Эн күүг толһачнр алхар седжәнә эсий? ²⁶Хәләтн, Энтн әмтнлә күүнджәнә, болв толһачнр Энүг хәрж үг келхш. Энүг Бурхна илгэсн Аврач гиж тедн бас санжахий? ²⁷Эн күн альдас ирсинь бидн меднәвидн. Зуг йосн Христос альдас ирхинь күн медхш, – гиж келцхәв.

²⁸– Тадн Намаг медвт. Намаг альдас ирсиг бас медвт. Үннәрий? Би эврә санаһарн ирсн угав. Намаг Илгэснһ йосн үннч. Зуг тадн Терүг медхшт. ²⁹Би Терүнәс ирв. Тер учрар Би Терүг меднәв. Тер Намаг илгәв, – гиж Исус әмтиг сүмд сурһсн цагт чаһар келв.

³⁰Тиигхлә тедн Исусиг бәрж авхар седв. Зуг нег чигн күн Исусиг көндәж чадсн уга. Учрнһ иим: Исусин цагнһ ирәд уга бәәж. ³¹Олн заагт ик зунһ Терүнд иткәд келв:

– Бурхна илгэсн Аврач ирхләрн Эн күүнә үзүлсн онц темдгүдәс үлү онц темдгүд үзүлхий?

Харулчир Исусиг бэрж авхар илгэгдсн

³² Исусин тускар эмтн ю шимлдж келжэхинь паршмуд соңсв. Терүг бэрж авхар паршмуд, ах гелнүгүд харулчнриг илгэв. ³³ Исус иигж келв:

– Би таднла невчкн зуур бээжэхэд, Намаг Илгэснд йовхв. ³⁴ Тадн Намаг хээхит. Мини бээх һазр тал тадн ирж чадшго учрас Намаг олж чадшгот.

³⁵ Евреямүдин толһачнр нег-негнэсн:

– Мадниг ирж чадшго гинэд альдаран эн йовхар седжэхмб? Грек эмтиг сурһхар еврей эмтн бээсн грек балһсд тал Эн йовжахмн болвза? ³⁶ «Тадн Намаг хээхит, зуг олж чадшгот. Мини бээх һазр тал тадн ирж чадшгот» гисн үгмүд юн үгмүд болжахмб? – гиж сурцхав.

³⁷ – Ундасжаснь Нан тал ирэд уутн. ³⁸ Юнгад гихлэ, Бурхна Бичгт иигж бичэтэ: «Нанд иткдг күүнэ дотрас эм өгчөх усна булг урсад бээх», – гиж Исус байрин алдр сүл өдртнь босад, чаң дууһар келв.

³⁹ Энд Исус Эрүн Сәкүснә тускар келлэ. Терүнд итксн күүнд, хөөннь Эрүн Сәкүсн өггдх. Итксн улст тер цагт Эрүн Сәкүсн өггдсн уга билэ, юнгад гихлэ, Бурхн Исусиг өөдлүлэд уга бээж.

Эмтн хоорндан эңгэрсн

⁴⁰ Зәрмнь Исусин үгмүд соңсад:

– Эн йосн аэлдэч! – гиж келцхэв.

⁴¹ Зәрмнь:

– Эн Бурхна илгэсн Аврач, – гив.

– Бурхна илгэсн Аврач Һалильяс ирхий? ⁴² Бурхна Бичгт, Бурхна илгэсн Аврач Давидин тохмас Давид бээсн Бетлехем гидг хотнас ирхинь бичэтэ эсий? – гиж зәрмнь келцхэв.

⁴³ Эмтн Исусин тускар келэд хоорндан эңгрж. ⁴⁴ Зәрмнь Терүг бэрж авхар седлэ, зуг нег чигн күн Исусиг көндөсн уга.

Евреямүдин толһачирин эс итклһн

⁴⁵ Аш сүүлднь, паршмуд болн ах гелнүгүд тал харулчнр хэрү ирцхэв.

– Юнгад тадн Исусиг бэрж эс авч ирвт? – гиж паршмуд болн ах гелнүгүд сурцхав.

⁴⁶ – Нег чигн күн урднь тиигж келсн уга билэ, – гиж харулчнр хэрү өгв.

⁴⁷ – Тер тадниг бас меклчкви? – гиж паршмуд сурв.

⁴⁸ – Ода күртл толһачнрас болн паршмудас нег чигн күн итксн уга биший? ⁴⁹ Уга. Зуг тер эгл эмтн закана тускар ю медх билэ? Теднд Бурхна харал тусж, – гиж паршмуд хэрүднь келв.

⁵⁰ Паршмуд заагт бээсн Никодим гидг күн бээж. Тер урднь Исусла харһдг бээсмн.

⁵¹ – Мана Закаһар бидн түрүлэд күүг ю кесинь медхэр сурж соңслго бээж, зарһинь кех зөв угавидн, – гиж Никодим келв.

⁵² – Чи бас Һалильясвч? Бурхна Бичг сөөнөр дасад медхич, Һалильяс нег чигн аэлдэч төрүц ирхш, – гиж тедн Никодимд хэрү өгв.

⁵³ Энүнэ хөөн цуһар гер талан тарад йовцхав.

Аля күүкд күүнэ йовдлын тускар

8 Иусуc олив модна уул темцж һарад йовв. ²Өрүн өрлэ Тер дэки сүмин һаза ирэд зогсв. Цуһар Терүнэ өөр ирэд хурцхав. Иусуc сууһад эмтнд сурһмж өгэд дасхв. ³Тер цагт ном цөөлһөчнр болн паршмуд нег аля йовдл һарһад бөргдсн күүкд кү Терүнүр авч ирэд, эмтнэ чирэд зогсав:

⁴ – Багш, эн күүкд күн хуульч йовдл кеһэд бөргдв. ⁵Мошен закан тиим күүкд улсиг чолуһар цокж алтн гиж закана. Та ю келнэт? – гиж тедн сурв.

⁶Тедн Иусуcиг сөрж тиигж сурцхав. Цааранднь Иусуcиг хэрүһинь өгч эс чадхлань, үгэрнь бөрж авхар эн күүндвриг эклцхэв. Зуг Иусуc өкөһэд, һазр деер юм бичэд суув. ⁷Тедн зогсн бээж суржахла, Иусуc босад:

– Тадн дундас килнц угань хамгин түрүн энүг чолуһар шивтн, – гиж келв.

⁸Дөкөд Иусуc саак кевэрн өвдглж сууһад һазр деер юм бичв. ⁹Энүг соңссн эмтнэс настань эклэд йовв, тедниг дураһад наадкснь бас дахлдв. Иусуc һанцарн үлдв. Күүкд күн Иусуcин өмн зогса бээж.

¹⁰ – Тедн цуһар яһсмб? Зарһичинь кех нег чигн күн үлдсн угай? – гиж Иусуc ормасн босад күүкд күүнд келв.

¹¹ – Уга күн үлдсн уга, Ах Нойн! – гиж тер күүкд күн келв.

– Би бас зарһичн кешгов. Эврәннь хаалһарн йов, эн өдрөс авн килнц бичө ке, – гиж Иусуc хэрүднь келв.

Исус – орчлнгийн герл

¹²– Би орчлнгийн герлв, Намаг дахжах күн харнуд йовшго. Тер эмн жирл өгдг герлтэ болна, – гиж хөөннь Исус дэктн эмтнд келв.

¹³– Чи эврэн Бийиннь тускар герчлжэнэч. Чини герчллн йосн үнн биш, – гиж паршмуд өмнэснь келцхэв.

¹⁴– Би Бийиннь тускар герчлв чигн, Мини үгмүд үнн. Юнгад гихлэ, Би альдас ирсэн альдаран йовхан меднэв. Тадн Намаг альдас ирсинь альдаран йовжахинь төрүц медж бөөхшит. ¹⁵Тадн эмтнэ хэлэцэр кү гемшэнэт. Би кү төрүц гемшэхшв. ¹⁶Кемр Би кү гемшэхлэрн үнн кевэр гемшэнэв. Юнгад гихлэ, Би ханцарн бишв. Намаг илгэсн Эцкм Нанла хамдан бөөнэ. ¹⁷Тана закаһар хойр күн герчлхлэ, теднэ герчллн чик болна. ¹⁸Би Бийиннь тускар герчлжэнэв. Намаг илгэсн Эцкм бас Мини тускар герчлжэнэ, – гиж Исус хэрүдн келв.

¹⁹– Чини Эцкчн альдв? – гиж тедн сурцхав.

– Тадн Намаг чигн болн Мини Эцким медхшит. Кемр тадн Намаг медсн болхла, Мини Эцким бас медх билэт, – гиж Исус келв.

²⁰Цуг энүнэ тускар Исус сүмд бэрц өгдг хээрцгин өөр зогсж келсмн. Исусин цагнь ирэд уга бөөж, тер учрар нег чигн күн Исусиг бэрж авсн уга.

Мини йовх һазрт тадн ирж чадшгот

²¹Дэкэд Исус иигж келв:

– Ода Би йовжанав. Тадн Намаг хөөһэд, килнцдэн даргдад үкхит. Мини йовх һазрт тадн ирж чадшгот.

²²– Энтн эмэн хорлж үкхэр седжэх бөөдлтэ. Юнгад гихлэ, Мини йовх һазрт тадн ирж чадшгот гиж келсмн, – гиж еврей-мүдин толһачнр хоорндан күүндцхэв.

²³– Тадн цуһар дора бөөсн орчлнгас болжанат. Би болхла деед тенгрэс. Тадн эн орчлнгийн эмтн. Би эн орчлнгийн бишв. ²⁴Би таднд келлүсв: Тадн килнцдэн даргдад үкхит. Кемр тадн Би бөөнэв гисн үгдм эс иткхлэ, тадн килнцдэн даргдад үкхит, – гиж Исус цаарандан келв.

²⁵– Тийгхлэ Та кембт? – гиж тедн сурцхав.

– Ю хээж би тадна күүндэд суунав? ²⁶ Кесг юм тадна тускар Би келж гемшэж чадх билэв. Зуг Намаг Илгэснэс сонссан орчлд герчлж келжэнэв. Намаг Илгэснь йосн үннч, – гиж Исус келв.

²⁷ Тедн Исусиг Эцкиннь тускар келжэхинь медсн уга. ²⁸ Цааранднь Исус келж бээнэ:

– Күмни Көвүг деер харсна хөөн Би бээнэв гисм лавга медж авхит. Эврэннь дурарн Би юм кежэхшв. Эцкимм дасхсн үгиг Би эмтнд цөөлж келнэв. ²⁹ Намаг Илгэснь Нанла хамдан бээнэ. Терүнд кергтэ юм Би оньдин кедв. Тегэд Намаг ханцарахим Тер үлдэхш.

³⁰ Эн үгмүдин хөөн кесгнь Исуст иткв.

Исус килнцэс яһж сулдэж хархин тускар келжэнэ

³¹ – Кедр тадн Мини номар бээхлэ, тадн йосн Мини сурхульчнр болжанат. ³² Тадн йосн үнниг медхит, үнн тадниг сулдхх, – гиж Исус Бийднь итксн евреймүдт келв.

³³ – Бидн Абрахамин үдлд тохм, бидн нег чигн күүнд заргдад мухла болж йовсн угавидн. Яһж чи мадниг сулдххмч? – гиж тедн хэрүднь келцхэв.

³⁴ – Үнэр келжэнэв, килнц кежэх күн килнцин мухла болжана. ³⁵ Мухла күн герт оньдиндан бээж чадхш. Көвүн болхла мөнкиндэн гертэн бээнэ. ³⁶ Кедр Көвүн тадниг сулдххла, тадн йосндан сул болхит. ³⁷ Тадниг Абрахамин үдлд тохминь меднэв. Мини үгм тадна седклд багтжахш, тер учрар тадн Намаг алх санатат. ³⁸ Би таднд Эврэннь Эцкэсн үзсн юман келжэнэв. Тадн болхла бас эврэннь эцкэсн сонссн юман келжэнэт, – гиж Исус теднд келв.

³⁹ – Мана эцкмдн Абрахам, – гиж тедн хэрү өгв.

– Кедр тадн Абрахамин үрдүд болсн болхла, тадн Абрахамла эдл кергэн күцэх билэт. ⁴⁰ Таднд Бурхнас сонссн үнниг келжэнэв. Тадн Намаг зөрц алхар седжэнэт. Абрахам тиигж бээдго билэ. ⁴¹ Тадн эврэннь эцкиннь кесн юмиг кежэнэт, – гиж Исус келв.

– Мадн нег эцктэвидн, Бурхн Бийнь – мана Эцк. Бидн йосар харсн үрдүд, – гиж тедн келцхэв.

⁴² – Кедр Бурхн тадна Эцк бээсн болхла, тадн Нанд дурга болх билэт. Юңгад гихлэ, Би нааран Бурхнас ирлэв. Эврэннь

санаһарн Би ирсн уга билэв, Намаг Бурхн илгэв. ⁴³Мини келсн үгм тадн яһад эс меднэт? Яһад гихлэ, тадн Намаг сонсхар седжэхшит. ⁴⁴Тана Эцктн – эрлг. Тегэд тадн терүнэ дурар бөөхэр седжэнэт. Тер кезэнэс авн үннлэ таардго алач бөөсмн. Терүнд төрүц үнн уга, худлч болн худын эцк. Тегэд худл терүнэ төрсн келн. ⁴⁵Би үнэр келжэнэв, тер учрар тадн Нанд иткжэхшт. ⁴⁶Тадна негнтн Намаг килнц һарһвч гиж гемшэж чадхий? Би таднд үнэр келхлэ, юнгад тадн эс иткнэт? ⁴⁷Бурхна үрдүд Терүнэ үг сонсна. Тадн Бурхна биш болад, Мини үгм сонсжахшт, – гиж Исус келв.

Абрахамас түрүд Би бээлэв

⁴⁸– Чи хар сәкүстә Шамарья күнч гихэд бидн чикэр келсн биший? – гиж евреймүд Исуст келцхэв.

⁴⁹– Би хар сәкүстә бишв. Би эврәннь Эцкән тевчнэв. Тадн Нанд му нер өгчэнэт. ⁵⁰Би Эврәннь нерэн туурулхар седжэхшв. Зуг Мини туурмж хээжэх, Мини төлэ эмтнэ зарһинь кедгнь бөөнэ. ⁵¹Үнэр келжэнэв: Үгм дахж күцэдг күн мөнкиндән үкшго! – гиж Исус келв.

⁵²– Чамаг хар сәкүснд эзлгдсинь ода бидн йосндан үзжөнөвидн! Абрахам болн аэлдэчнр кезэнэ өнгрж одв. Зуг үгим дахж күцэдг күн мөнкиндән үкшго гиж Чи келжэнэч. ⁵³Чи мана Абрахам эцкэс деер болжахмчи? Абрахам өнгрв, болв аэлдэчнр кезэнэ өнгрж одв. Бийән кенд тоолад тиигжэхмч? – гиж евреймүд хээкрцхэв.

⁵⁴– Кемр Би Бийдән туурмж хээжэхлэ, тер туурмж юмн биш. Зуг Мини Эцкм Намаг туурулжана! Тадн Терүг Мана Бурхн гиж дууднат! ⁵⁵Тадн Терүг төрүц меддго билэт. Зуг Би Терүг меднэв. Кемр Би Терүг медхшв гиж келсн болхла, Би таднла эдл худлч болх билэв. Зуг Би Терүг меднэв. Терүнэ келсн үгмүдиг сонсж күцэдв. ⁵⁶Абрахам эцктн цагм үзх гиж байрлжала. Цагм үзэд ик байрта үлдв, – гиж Исус хэрү өгв.

⁵⁷– Чи эврән тэв күрэд угач, яһж Абрахамиг үзсмч? – гиж евреймүд сурцхав.

⁵⁸– Абрахам экиннь геснэс һарад уга бээтл Би Бээлэв, үнэр таднд келжэнэв, – гиж Исус келв.

⁵⁹Тиигхлэ тедн чолу авад Исус тал шивж алхар седв. Зуг Исус теднэс бултад, сүмэс һарад йовж одв.

Сохр кү эдгэлһн

9 Нег дэжж Исус йовж йовад, нег сохр кү үзв. Тер күн харснас авн сохр бээж.

²– Багш, эн күн юнгад сохр харсмб? Кен килнц харсмб, эн күн аль энүнэ эк-эцкнь? – гиж сурһульчнр Исусас сурцхав.

³– Тер чигн, эк-эцкнь чигн килнц харһсн уга. Эн күг эдгөһэд, эмтнд Бурхна күчиг үзүлхэр цуг эн учрв. ⁴Өдр чилэд уга бээтл бидн Намаг Илгэсн Эцкин керг күцэх зөвтөвидн. Удл уга харһу сө болх, тиигхлэ күн юм кеж чадшго. ⁵Эн һазр деер бөөтл Би нарт делкэн герл болжанав, – гиж келэд, ⁶Исус һазрт нульмад, шүлсэрн шора зуурч, сохр күүнэ нүднднь түркв.

⁷– Ода болхла йовад Шилоах гидг уснд нүүрэн уһачк, – гиж Тер сохр күүнд келв.

(Шилоах гисн – «Илгэгдсн» гисн үг.) Сохр күн йовад, нүүрэн уһаһад ирхлэрн юм үздг болв. ⁸Хам-хоша бээсн эмтн терүг һууль һууж йовсинь үзсн эмтн сурцхав:

– Эн һууль һуужасн күн мөн биший?

⁹Зөрмнь:

– Тертн Бив, – гив.

– Уга, энтн терүнэ дүрстө, – гиж зөрмнь келцхэв.

Эдгсн күн бийнь келв:

– Тертн Бив.

¹⁰– Яһж чамд нүднэ харан орв? – гиж тедн сурцхав.

¹¹Тер хэрүднь:

– Исус гидг нертэ күн шораһар бальчг кеһэд мини нүднд түркв. Дөкөд Тер Шилоах гидг уснд нүүрэн уһа гив. Би йовад нүүрэн уһасна хөөн үздг болв. Нүднэ харан нанд орв, – гиж келв.

¹²– Тер күн альдв? – гиж тедн эдгсн күүнэс сурцхав.

– Би меджэхшв, – гиж эдгсн күн хэрү өгв.

Паршмуд харан орсн күүг мөшкжэнэ

¹³Тиигхлэ тедн харан орсн күүг паршмуд тал авч ирцхэв.

¹⁴Бөмб өдр Исус шүлсэрн шора зуурч, эн күүнэ нүдн хара орулв. ¹⁵Паршмуд тер күүнэс:

– Нүднэ харан чамд яһж орсмб? – гиж сурцхав.

– Исус мини нүдм бальчг түркв, би нүүрэн уһаһад юм үздг болв, – гиж эдгсн күн келв.

¹⁶Зэрм паршмуд:

– Чамаг эдгэсн күн Бурхнас ирсн күн биш, юнгад гихлэ, энтн бемб өдриг бемб өдр гиж тоолхш, – гицхэв.

Зэрмнь болхла:

– Килництэ күн тиим өвэрц юмиг яһж чадхмб? – гиж келцхэв.

Теднэ хэлэц-тоолврнь онц йилһгдв.

¹⁷– Нүднчн Тер сексн учрас чи эврэн Терүнэ тускар ю келж чадхмч? – гиж паршмуд эдгсн күүг мөшкв.

Эдгсн күн:

– Тер ээлдэч, – гив.

¹⁸Евреймүдин толһачнр терүг сохр бээсинь, дэкэд нүднэ харан орсинь итксн уга бээж. Тедн тер күүнэ эк-эцкинь дуудхар шиидв.

¹⁹– Эн тана көвүнтн биший? Энүнэ тускар тадн сохр билэ гисн бишийт? Ода яһж энтн юм үздг болсмб? – гиж тедн сурцхав.

²⁰– Эн мана көвүн гиж бидн таньжанавидн, энүг һарснас авн сохр бээсинь меднэвидн. ²¹Зуг яһж эн юм үздг болсинь, кен нүдинь эдгэсинь бидн медхшвидн. Энүг бийэснь суртн. Мана көвүн нас күрсн күн, хэрүһинь таднд өгч чадх, – гиж эк-эцкнь келцхэв.

²²Эк-эцкнь евреймүдин толһачнрас эәһэд тиигж келцхэв. Юнгад гихлэ, Исусиг Бурхна илгэсн Аврач гиж тоолснь хурлас көөгдх гисн шиидвр евреймүдин толһачнр батлсмн. ²³Тегэд чигн эк-эцкнь:

– Энтн наста күн, бийэснь суртн, – гицхэв.

²⁴Паршмуд эдгсн күүг хойрдад дуудв.

– Бурхна чирэд үн кел! – гиж тедн келцхэв, – Чамаг эдгэсн күүг килництэһинь бидн меднэвидн.

²⁵– Терүг килництэ эс килництэһинь би медхшв. Урднь сохр бә-әһэд, дэкэд харата болсан сәәнәр меднәв! – гиж эдгсн күн келв.

²⁶– Тер чамд ю кесмб? Чини нүдичн яһж эдгсмб? – гиж паршмуд мөшкв.

²⁷– Би таднд келж өгләв, тадн соңссн угат. Намаг дәкн-дәкн-нәс соңсх дурн таднд яһад күрэд бәәнә? Тадн Терүнэ сурһульчнр болхар бас седжәхмбт? – гиж тер хэрү өгв.

²⁸Тиигхлэ тедн эдгсн күүг шоодад, му келәд:

– Чи эврэн Терүнэ сурһульч! Бидн Мошен сурһульчнрвидн!

²⁹Бурхн Мошелә күүндсинь бидн меднэвидн. Эн күүнә тускар

болхла бидн юм медхшвидн. Эн күн альдас ирсинь медхшвидн, – гиж тедн келцхэв.

³⁰– Я-а! Акад юмб? Терүг альдас ирсинь чигн медхшийт? Тертн болхла мини нүдм секв. ³¹Бурхн килнцтэ эмтиг соңсхш гисинь бидн меднэвидн. Бийинь күндлдг Терүнэ дурар бээдг эмтиг Бурхн соңсдгинь бидн меднэвидн. ³²Орчлн үүдснэс авн ода күртл кен чигн харснас авн сохр күүнд хара орулдгинь соңсгдад уга. ³³Кемр Эн Күн Бурхна Күн биш болсн болхла, Тер иим юм үзүлж чадшго билэ, – гиж эдгсн күн хэрүднь келв.

³⁴– Чи килнцтэ төрлөч. Маднд уха заах зөв чамд уга, – гиж хэрүднь келэд, тедн эдгсн күүг хурлд ирдгинь уурулв.

Сохр ухан-седклин тускар

³⁵Исус эдгсн күүг паршмуд тиигсинь сонсад, терүг олж авад сурв:

– Чи Күмни Көвүнд иткжэнч?

³⁶– Тертн кемб, Ах Нойн минь? – гиж тер сурв, – Келтн нанд, би Терүнд иткнэв.

³⁷– Чи ода Терүг үзжэнэч, Тер чамта күүнджэнэ, – гиж Исус келв.

³⁸Тиигхлэ күн:

– Деед Эзн, би иткжэнэв, – гихэд Исуст сөгдж мөргв.

³⁹Исус келв:

– Сохр эмтнд хара орулж, харата эмтиг сохрулхар Би эн орчлнд ирв.

⁴⁰Өөрнь бээсн паршмуд:

– Бидн бас сохр болжахмб? – гихэд сурцхав.

⁴¹Исус:

– Кемр тадн сохр бээсн болхла, тадн эврэннь килнцдэн буру уга болх билэт. Зуг тадн үзжэнэвидн гисн төлөдэн, тадн деерэн буру толхатат.

Хөөчин тускар

10 – Хөөнэ хаша дотр үүдэр орлго талдан орм олж авад орсн күн – хулхач болн деермч, гиж үнэр таднд келжэнэв. ²Хашан үүдэр орсн күн эврэннь хөөдин хөөч мөн. ³Манач терүнд үүдинь секнэ. Хөд дууһинь соңсна. Тер эврэннь хөөдөн нерэрнь дуудад, дахулад назаран харна. ⁴Хөөч хөөдөн цуглуулж назаран

һарад, бийнь өмннь һарад уралан йовна. Эзнэ ду таньдг учрас тедн хөөчин ардаснь дахж йовна. ⁵Күүнэ ду хөд медхш. Тегэд күүнэ күүг тедн дахшго. Хөд гүүһэд тарад йовж одх, – гив.

⁶Исус үлгүрлж келсмн, зуг Терүнэ үгмүдин чинринь эмтн медж чадсн уга.

Исус – сән хөөч

⁷– Би хөөнэ хашан үүднв, гиж үнэр келжәнэв. ⁸Нанас урд ирсн эмтн хулхачнр болн деермчнр. Хөд тедниг соңссн уга. ⁹Би лавта үүднв. Нанар дамжж орж һарснь эмән харсж аврх. Тер күн орж һарад, урһцта-идгтө һазр олж авх. ¹⁰Хулхач юм хулхалхар, алхар, күүчж хамхлхар ирнэ. Би болхла эмтнд йосн элвг-делвг эмн-жирһл өгхэр ирв. ¹¹Би сән хөөчв. Сән хөөч эврәннь хөөдин төлө эмән эрвллго өгхдән белн. ¹²Ялч болхла йосн хөөч биш. Хөд терүнэ биш. Ялч аашсн чоныг үзхлэрн, хөөдиг хаяд, эәһэд, зулад йовж одна. Тиигхлэ чон зэрм хөөдиг шүүрч авна, наадкснь тарад йовж одна. ¹³Ялч йосн хөөч биш, тер ялч болад зулж одна. Тер хөөдиг йосндан асрж хэлэхш. ¹⁴⁻¹⁵Би сән хөөчв. Эцк Намаг меднэ, Би Эцкән бас меддв. Тиим кевэр Би Эврәннь хөөдөн сөөнөр меднэв, хөөдм Намаг бас меднэ. Эврәннь хөөдин төлө Би эмән эрвллго өгхдән белнв. ¹⁶Талдан хөд Нанд бас бөөнэ. Тедн эн сүргин хөд биш. Би тедниг бас дахулж авч ирх зөвтөв. Тедн Мини ду бас соңсх. Удл уга цуһар нег хөөчтө нег сүрг болх! ¹⁷Би эмән хэрү авхин төлө өгхдән белнв. Тер учрар Эцк Нанд хөөртө. ¹⁸Кен чигн Мини әмиг булаж авч чадшго. Би эврә дурарн эмән өгчәнэв. Эмән өгч чигн, хэрү авх чигн йосн Нанд бөөнэ. Тиигж Нанд Эцкм закв, – гиж Исус келв.

¹⁹Эн үгмүдин хөөн еврей әмтн хоорндан хувагдв.

²⁰– Эн – ухань көндрсн хар сәкүстә күн. Ю хөөж Энүг соңсжант? – гиж кесгнь келцхәв.

²¹Зәрмнь:

– Хар сәкүснд эзлгдсн күн тиигж келшго. Хар сәкүсн сохр күүнд хара орулж чадхмб? – гицхәв.

Евреймүд Исуст иткжәхи

²²Үвл болсмн. Ерусалимд хол сүм шинрүлж нерәдлһнэ нәр болв. ²³Исус сүмин хашан дотрк Соломон хаана нертө бөөрн дотраһар йовж йовла. ²⁴Әмтн Терүнэ өөрнь зогсв.

– Кедү күртл Чи мадниг өврүлж зовахмч? Кемр Чи Бурхна илгэсн Аврач болхла, тодрхаһар кел маднд, – гиж тедн келхэв.

²⁵Исус иигж келв:

– Би таднд келлэв. Тадн итксн угат. Эцкинм күчэр кесн йовдлмуд Мини тускар келжэнэ. ²⁶Тадн Мини хөд биш болсн учрас Нанд иткжэхшит. ²⁷Мини хөд дууһим соңсна. Би тедниг таньж меднэв. Тедн Намаг дахж йовна. ²⁸Би теднд мөнк жирһл өгнэв. Тедн мөнкиндэн үкшго. Мини хөөдиг Нанас күн булаж авч чадшго. ²⁹Нанд Эцкин өгсн юмн цуг юмнас дер. Тедниг Эцкэс күн булаж чадшго. ³⁰Эцк Би хойр ни-негн-видн.

³¹Тиигхлэ евреймүд саак кевөрн Исусиг алхар чолу харган авцхав.

³²Зуг Исус:

– Би тана чирэд Эцкин даалһсн кесг сэн йовдлмуд күцэвүв. Ямаран йовдлас көлтэ тадн Намаг чолуһар цокхар седжэхмт? – гиж келв.

³³– Бидн чамаг сэн йовдлмудас көлтэ цокхар седжэхш-видн. Чамаг Бурхиг му келснэ төлөд, эгл күн Бийэн Бурхнд тоолсн төлөд чолуһар цокхар седжэнэвидн, – гиж евреймүд хэрүцв.

³⁴– «Тадн – бурхд» гиж Бурхн келснь тадна Заканд бичэтэ биший? ³⁵⁻³⁶Бурхна Бичгт бээсн үгмүд мөнкиндэн үнн болдгинь бидн меднэвидн. Бурхна Үг авсн улсиг бурхд гиж Бурхн нерэдсн биший? Намаг Эцкм шүүж авад орчлд илгэв. Би – Бурхна Көвүнв гиж келхлэ, Бурхиг муурулжана гihэд яһад тадн Намаг гемшэжэхмбт. ³⁷Кемр Мини Эцкин даалһсн йовдлмудыг Намаг эс күцэхлэ, бичэ Нанд итктн! ³⁸Кемр Мини Эцкин даалһсн йовдлмудыг Би күцэхлэ, Мини үгд эс итквчн, Мини кесн йовдлмудт итктн. Тиигэд Би Эцклэ негдэд, Эцк Нанла негдэд бөөдгинь медхит, – гиж Исус келв.

³⁹Тедн саак кевөрн Исусиг бөрж авхар седв, зуг Исус теднд бөргдсн уга. ⁴⁰Цааранднь Исус дөкэд Йордан холын телтр эрг тал нарч йовад тенд үлдсн. Тенд Йохан урднь эмтиг уснд кирслсн. ⁴¹Олн күн Исусур ирлэ:

– Йохан өвэрц йовдлмуд эс үзүлв чигн, зуг эн күүнэ тускар келснь цугнь үнн, – гиж тедн келхэв.

⁴²Тенд олн эмтн Исуст итксн.

Лазарин үкл

11 Йудья назрин Бетэнья хотнд Лазарь гидг күн гемтж. Тер Март Мирьям гидг хойр эгчтэ бөөдг бөөж. ² Мирьям канкисн үнртэ тосиг Деед Эзн Исусин келднь түркэд, үсэрин арчдг күүкд күн. Терүнэ дү Лазарь күнд гемтэ бөөж.

³ – Деед Эзн, Тана хээртэ үр икэр гемтжэнэ, – гиж эгчнр Исус тал зэнг илгэв.

⁴ Исус энүг сонсад:

– Эн гемэс келтэ Лазарь үкшго. Бурхиг туурулхин төлө цуг эн учрх. Бурхна Көвүг бас туурулхин төлө эн гем ирж, – гиж келв.

⁵ Март, Мирьям болн Лазарь хурвнд Исус ик дурта бөөж. ⁶ Зуг Лазариг гемтэ бээсинь соңсв чигн, Исус бээсн назртан хойр өдртэн бөөв. ⁷ Энүнэ хөөн Исус эврэннь сурһульчнртан:

– Хэрү Йудья назрур йовхмн, – гиж келв.

⁸ – Багш, тенд эмтн Таниг чолуһар цокхар седлэ. Тер бийнь Та тиигэрэн йовх санатавт?! – гиж сурһульчнр келв.

⁹ – Арвн хойр часин кемжэнд өдр герлтэ болна, тиим эсий? Өд-рэр йовсн күн бүдршго, тер эн орчлңгин герлиг үзнэ. ¹⁰ Ора сөө-һэр йовдг күн бүдрх, юнгад гихлэ, тер герл уга, – гиж Исус келв.

¹¹ – Мана үр Лазарь унтж одв, зуг Би терүг серүлхэр йовжанав, – гиж Исус немж келв.

¹² – Деед Эзн, кемр тер унтсн болхла, тертн эдгжэх болвза? – гиж сурһульчнр сурв.

¹³ Исус теднд Лазарь өнгрв гиж келлэ, зуг сурһульчнр Исусиг нөөрин тускар келжэхинь санв. ¹⁴ Тиигхлэ Исус:

– Лазарь өнгрж одв, – гиж илэр келв.

¹⁵ – Терүнлэ хамдан урднь эс бээсндэн Би байрлжанав. Энүн деерэс тадн Нанд иткхит. Эн учрсн юмн таднд туста болх. Лазарь тал йовцхай, – гиж Исус немж келв.

¹⁶ Тиигхлэ Томас гидг күн (тер Икрин өрөсн бээсмн) наадк сурһульчнрт келв:

– Йовцхай! Исусла хамдан үкцхэй!

Исус эгч дү хойрин зуркинь тогтнулжана

¹⁷ Исусиг ирхд Лазарин цогцнь дөрвн өдр үкэрт кевтсн бөөж. ¹⁸ Бетэнья Ерусалимас хурвн дууна шаху бээсмн. ¹⁹ Урднь Март Мирьям хойрт кесг евреймүд ирэд, теднэ ахиннь тускар һундл

төрүлж. ²⁰ Исусиг аашсинь сонсад, Март Терүг тосхар харв, Мирьям гертэн үлдв.

²¹ – Деед Эзн минь, Таниг энд бээсн болхла, дүм үкшго билэ.

²² Болв би ода чигн меднэв, Бурхн сурсн юмитн Танд өгх, – гиж Март Исуст келв.

²³ – Чини дүүчн эмдрх, – гиж Исус хэрүднь келв.

²⁴ – Би меднэв, тертн сүл өдрт эмдрлһнэ өдрт эмдрх, – гиж Март келв.

²⁵ – Би – эмдрлһн болн жирһл. Нанд иткдг күн үкв чигн эмдрх. ²⁶ Болв эмд деерэн Нанд иткснь төрүц үкшго. Чи Мини келсн үгд иткжәнчи? – гиж Исус сурв.

²⁷ – Э, иткжәнэв, Деед Эзн, Таниг орчлнд ирсн Бурхна Көвүн – Бурхна илгэсн Аврач гисинь иткжәнэв, – гиж Март хэрү өгв.

Исус уульжана

²⁸ Цуг энүг келэд, Март хэрж ирэд, дү күүкән дуудад:

– Багш ирв, энд бөөнө. Тер чамаг дууджана, – гиж шимлдж келв.

²⁹ Мирьям үгинь сонсад, босад Исус тал адһж нарад йовв.

³⁰ Исус тер хотн дотр орад уга бээсмн. Тер Мартан тоссн ормд зогжала. ³¹ Мирьямин герт ирсн евреймүд терүнд сана зовж төвкнүлжэлэ. Мирьямиг босад йовхлань, терүг үкэр тал уульхар йовжана гиж санад, тедн ардаснь дахв. ³² Мирьям Исусин бээсн назрт ирэд, Терүг үзэд, көлднь киисэд келв:

– Деед Эзн минь! Таниг энд бээсн болхла, дүм үкшго билэ, – гив.

³³ Исус оркрж уульжах Мирьямиг болн евреймүдиг үзэд, нашудж гейүрв.

³⁴ – Терүнэ цогцинь тадн альд тэвсмт? – гиж Исус сурв.

– Йовхм, Та эврэн үзхит, – гиж тедн келцхэв.

³⁵ Исус уульв.

³⁶ – Энтн үнэр Лазарьт хээртэ бээж, – гиж евреймүд нег-негндэн келцхэв.

³⁷ Тер бийнь зэрмнь:

– Сохр күүнд хара өгсн күн Лазариг өнгрүлшгоһар юнгад юм эс кесмб? – гиж келцхэв.

Исус Лазариг амдрүлжэнэ

³⁸ Исус гейүрэд үкэр тал йовв. Үкэр гисн хадын көндө билэ. Хадын амн чолуһар хаалһата бээж.

³⁹ – Эн чолу түлкэд хооран кетн, – гиж Исус закв.

Үксн күүнэ эгчнь Март:

– Деед Эзн минь, тендэс үмкэ үнр һарчана, Лазарин цогцнь дөрвн өдр үкэрт кевтнэ, – гив.

⁴⁰ Тиигхлэ Исус:

– Би чамд келлүсв, кемр иткхлэчн, Бурхна туурмж чамд үзгдх, – гиж хэрү өгв.

⁴¹ Чолуг түлкэд хооран кеснэ хөөн Исус тенгр хэлэхэд келв:

– Аав минь, Намаг соңсжасн төлөд Би Чамд ханлт өргжэнэв.

⁴² Би меднэв, Чи Намаг оньдин соңснач. Би цуг энүг энд зогссн эмтнэ төлө келжэнэв. Чи Намаг илгэввч гиснд эдниг итктхэ гиж келжэнэв.

⁴³ Эн үгмүд келэд Исус чанһар дуудв:

– Лазарь, һар нааран!

⁴⁴ Үксн күн һарв. Терүнэ һар-көлнь еврей эмтнэ заңшалар цаһан кенчрэр, чирэнь альчулар оралһата бээсмн.

– Боодһанинь тээлэд, йовултн, – гиж Исус келв.

Деед хург Исусиг алхар шийдснь

⁴⁵ Мирьям тал ирсн евреймүдин кесгнь Исусин кесн өвөрц үзэд Терүнд иткв. ⁴⁶ Зуг зэрмнь паршмуд тал йовад, учрсн йовдлын тускар цээлһж келж өгв. ⁴⁷ Ах гелнгүд болн паршмуд Деед хург кев:

– Эн күн дала өвөрц йовдлмуд кенэ. Ода яахмб? – гиж тедн сурцхав.

⁴⁸ – Кемр бидн Терүнд зөв өгэд бээхлэ, Тер кех юман цааранднь кех, тер учрар цуһар Терүнд иткх. Тиигхлэнь Римин улс ирэд мана сүмиг болн келн эмтиг уга келһэд тарах, – гиж тедн келцхэв.

⁴⁹ Кээп гидг күн тер жилд ах гелн болж йовсмн тер:

– Тадн юм меджэхшит. ⁵⁰ Нег келн-эмтн үкхин ормд нег күн цуг келн эмтнэ төлө үкснь деер болхиг тадн меджэхшийт? – гив.

⁵¹Тер эврэ уханасн эн үгмүд келсн уга, тер цагт ах гелң болсн төлөд тер Исус еврей әмтнә төлө үкх гисн әәлдхлиг келж өгв. ⁵²Болв һанцхн еврей әмтнә төлө биш, цуг оln зүсн нутгт бәәсн Бурхна үрдүдин төлө, тедниг цуглулж негдүлхин төлө Исус әм-нәсн ханцулгдх.

⁵³Тер өдрәс авн тедн Исусиг алх арһ хәәдг болв. ⁵⁴Тер учрар Исус еврей әмтнә заагт ил йовдган уурв. Тер әжго кәдән өөр бәәсн Әпрам гидг хотнур йовж одв. Тенд Исус эврәннь сур-хульчнртаһан бәәв.

⁵⁵Йудья әмтнә Песах гидг нәр өөрдж йовла, әрвслһнә йос күцәхин төлө, кесг әмтн еврей нутгин һазр болһнас Ерусалим балһснур ирцхәв. ⁵⁶Тедн Исусиг хәәлдәд, сүмд ирәд нег-нег-нәсн:

– Эн байр-нәәрт Тертн иршго болвза? – гиж сурцхав.

⁵⁷– Кедр Исусиг альд бәәхинь күн медхлө, Терүг бәрж авхар дарунь теднд келж өгх зөвтө, – гисн заквр ах гелнүд болн пар-шмуд һарһв.

Мирьям Исусин кәлднә канкисн үнртә тос асхснә

12 Песах гидг нәр күртл зурһан өдр үлдж. Исус Бетәнья гидг Лазарь бәәсн хотнур ирв. Тер хотнд урднә Исус Лазариг әмдрүлсмн. ²Энд Исусин төлө байрин хот белдв. Март хотынә зөөһәд ширә деер тәвв. Лазарь талдан гиичнрлө болн Исусла хамдан ширә эргж сууж. ³Мирьям савд [литрин өрәл дүнгә] кесн нард гидг үнтә канкисн үнртә тосиг авад, Исусин кәл деернә асхад, үсәрн арчв. Гер канкисн үнрәр дүүрв. ⁴Исусин нег сур-хульч Йуда Искериот (хөөннә тер Исусас урвсмн):

⁵– Эн тосиг һурвн зун цаһан мөңгнд* хулдад, мөңгинь һу-ульһнч әмтнд өгх йоста бәәсн юмн, – гиж келв.

⁶Тер энүг һуульһнч әмтнд санань зовад, теднә арһинь хәәхин төлө келсн биш тер хулхач болад тиигж келв. Йуда мөңг хадһлдг хәәрцгтә бәәж. Тегәд тер мөңгән бәәж-бәәжәһәд эврән эдлдг бәәсмн.

⁷– Эн күүкд күүг бичә гемшәтн. Эн тосиг Намаг оршахар эн хоршаж хадһлтха! ⁸Тадна өөр угатя яду әмтн оньдин бәәх. Би болхла удл уга таднас салхв, – гиж Исус келв.

* Нег цаһан мөңгн нег өдрин жалв бәәж.

Лазарин тускар болсн нууц күүндлһн

⁹ Тер саамд кесг евреймүд Исусиг тенд бээсинь медчкэд ирц-хэв. Тедн һанцхн Исусиг хэлэхэр биш дэкэд Лазариг үзхэр ирж. Юңгад гихлэ, тедн Лазариг Исус эмдрүлж гисн зэнг соңсж. ¹⁰⁻¹¹ Евреймүдин ик зунь Лазарас көлтэ ах гелнүгүдиг үлдэхэд, Исус тал ирэд, Терүнэ итклд орсн төлөд ах гелнүгүд Лазариг бас алхар седв.

Ик байртаһар Ерусалим балһснур орж ирлһн

¹² Маңһдуртнь Песах гидг байрта нээрт ирсн эмтн Исусиг Ерусалим тал ирж йовхинь соңсв. ¹³ Тедн шавар зандн* модна бүчрмүд авад, Исусиг тосж харв.

– Бурхн тууртха! Деед Эзнэ нерн деерэс ирснь эдстэ болтха! Израилин Хан эдстэ болтха! – гиж оln эмтн хээкрцхэв.

¹⁴ Исус баахн элжгниг олж авад унад йовж. ¹⁵ «Сиона күүкн бичэ э! Хэлэ! Баахн элжгниг унж авсн чини Хан йовж йовна» гиж Бурхна Бичгт бичэтэ бөөнө. ¹⁶ Түрүлэд Исусин сурһульчнр яһад тиигжэхинь медсн уга. Зуг Терүг өврмжтэ кевэр эмдрснө хөөн тедн Исусин тускар Бичгт тиигж бичгдсинь тодлв. Яһад иигж кесинь бас тедн тодлв. ¹⁷ Исус Лазариг үкэрэснь дуудж авад, цогцинь яһж эмдрүлсинь үзсн эмтн зогсл уга күн болһнд келдг бөөсмн. ¹⁸ Ода тедн тиим өвэрц йовдл кесн күн аашсиг медэд, харч Исусиг тосв.

¹⁹ – Бидн ю эс кеввчн тус болжахш. Цуг нарт делкэ Терүг дахж йовна! – гиж паршмуд уурлад хоорндан келцхэв.

Исус эврәннь үклин тускар келснь

²⁰ Тер байрт ирсн эмтн заагт нег цөөкн грек келн эмтн Бурхнд сөгдхэр ирж. ²¹ Тедн Һалилья һазрин Бетсэд хотна Пилип гидг Исусин сурһульч тал өөрдэд:

– Тана зерг, бидн Исусиг үзх саната билэвидн, – гиж сур-цхана.

²² Пилип Андрей тал йовад энүнэ тускар келв, тедн хоюрн тер эмтнэ тускар Исуст келв. ²³ Исус иигж келв:

* Шавар зандн модн. Орсад болхла, пальма.

– Күмни Көвүнэ, Мини туурхин цаг ирв. ²⁴Би үнэр келжэ-нэв: Буудян экн һазрт унад эс үкхлэ, негхн болж үлднэ. Кемр буудян экн үкхлэ, оln буудя өгч урһна. ²⁵Тер учрар эмэн эрвлснь эмэн геех. Эн орчлнд эмэн эрвлдгонь мөнк жирһл эдлх. ²⁶Нанд церглжэх күн Намаг дахж йовтха! Мини бээсн һазрт зарцм бээнэ. Нанд церглжэх күүнд Эцкм ачинь хэрүлх. ²⁷Мини седклм икэр зовж бээнэ. Ю келхв ода? Аав минь, Намаг эн цагас гетлүлит! Зуг Би эн цагин төлэ ирсн бээнэв! ²⁸Аав минь, нерэн туурултн!

– Би туурлав, болв дэkn туурхв! – гисн дун генткн тенгрэс соңсгдв.

²⁹Тенд зогссн оln эмтнэс зэрмнь тер дууг соңсад, эн оһтрһун дун һарв гиж келххэв. Зэрмнь Бурхна элч Терүнлэ күүндв гив.

³⁰– Эн дун Мини төлэ биш тадна төлэ, – гиж Исус келв.

³¹Ода эн орчлнгин зарһ келһнэ цаг ирв, эн орчлнгин Нойн цааран көөгдх. ³²Һазрас деешэн өрггдх цагт цуг эмтнэ оньг Нанд тусх. ³³Эн үгмүдэр Исус ямаран үклэр үкхин тускар цэ-элһж келв. ³⁴Олна заагт бээсн улс:

– Бидн Бурхна Бичгт Христос мөнкинд эмд бөөх гиж умшлавидн. Ода юнгад Та Күмни Көвүн деешэн өрггдх гиж келжэхмт? Күмни Көвүн гиснь кемб? – гиж келххэв.

³⁵– Таднла бээсн герлд бачм цаг үлдв. Харһһу эс болтл, өд-рин герлтэд йовтн. Харһһуд йовсн күн альдаран йовсан медхш. ³⁶Герл герлтжэх кемд герлд итктн. Герлин көвүд болхит! – гиж Исус теднд келэд, һарад цааран йовж одв.

Евреймүд иткжэхши

³⁷Исусиг кесг өвэрц йовдлмуд үзүлвчн эмтн Терүнд итксн уга. ³⁸Цуг эн Эшья гидг аэлдэчин келснь бүтдгэр учрв: «Деед Эзн! Кен мана келснд итксмб, кенэ нүднд Деед Эзнэ күч секгдсмб?» ³⁹Тедн иткж чаддго бөөж, энүнэ учринь Эшья гидг аэлдэч: ⁴⁰«Нүдөрн бичэ үзтхэ гихэд, ухаһарн бичэ медтхэ гихэд, Бурхн теднэ нүдинь сохлж, ухаһинь хаав. Тегэд тедн бийэн эдгэхэр Нан тал эргж хэлэшго гиж Деед Эзн келв», – гиж келв. ⁴¹Эшья Деед Эзнэ туурмж үзсн учрар Терүнэ тускар иигж келсмн.

⁴²Тер цагт толһачнр дундас кесгнь Исуст иткв. Зуг паршмуд тедниг хурлас салһх гихэд, эврәннь итклин тускар ил келдго бөөсмн. ⁴³Эмтнэ магтлһн Бурхна магталас теднд деер бөөж.

Исусин үг – зарһч

⁴⁴ – Нанд иткдг күн Нанд биш Бийим илгэсн Бурхнд иткнэ. ⁴⁵ Намаг үздг күн Бийим илгэсн Бурхиг үзнэ. ⁴⁶ Би – Йосн герлв. Нанд итксн күүг харһуд үлдэшгоһар Би эн орчлнд ирв. ⁴⁷⁻⁵⁰ Мини үгм соңсад эс күцэдг күүнд Би зарһч бишв. Би эн орчлңгиг гемшэхэр ирсн угав. Эн орчлңгиг харсж аврхар ирв. Намаг холж Мини келсим эс күцэсн күүнд зарһчнь бөөнэ. Үгм сүл өдрт терүнэ зарһч болх. Би эврәннь нернэс келсн угав. Бийим илгэсн Эцкм иигж келх заавр өгв. Терүнэ заавр – мөнк жирһл гисинь Би үнэртэн меднэв. Мини Эцкимм зааж өгсн үг Би таднд келжэнэв.

Исус сурһульчнриннь көл уһажана

13 Песахин байрин өмнк өдр билэ. Эн һазриг үлдэхэд, Эц-күрн хэрү йовх цаг ирсинь Исус медэд бөөлэ. Исус эн һазрт бөөх сурһульчнртан дегд энкр билэ, үктлөн чигн энкр билэ. ² Сурһульчнр Исусла хамдан асхни хот эдлв. Тер цагт эрлг Шимона Искериотин көвүнд Йудад Багшас урвах уха-сана орулв. ³⁻⁵ Бурхн Эцк Исусин һарт бөөсн күчэн өгсинь болн Тер Бурхнас ирэд ода Бурхн тал хэрж йовхинь Исус медв. Исус босад, деерк хувцан төөлж, альчурарн бийөн бүслв. Цааранднь Тер савд ус кеһэд, сурһульчнрин көл уһаһад, бүслсн альчурарн арчв. ⁶ Шимон Пётр тал Исус өөрдхлөнъ тернь:

– Деед Эзн минь! Та мини көл уһахар седжэнт? – гив.

⁷ – Ода Намаг ю кежэхинь чи меджэхшич, зуг хөөннь мед-хич, – гиж Исус хэрү өгв.

⁸ – Та мини көл төрүц уһашгот! – гиж Пётр келв.

– Кедр Би Чини көличнь эс уһахла, чи Нанла хамдан негдш-гоч, – гиж Исус хэрүднь келв.

⁹ – Тиигхлэ, Деед Эзн минь, һанцхн көл биш, һарм, толһаһм бас уһатн, – гиж Пётр келв.

¹⁰ – Цевр күүнэ һанцхн көлинъ уһах кергтэ, юнгад гихлэ, терүнэ цогцнь цевр. Тадн цевр бөөнэт, зуг цуһар биш, – гиж Исус хэрүднь келв.

¹¹ Терүнэс урвх күүг Исус медлэ, тегэд чигн цуһар цевр би-шит гив. ¹² Сурһульчнрин көлинъ уһаһад, Исус деерк хувцан өмсэд, Эврәннь ормдан ирэд суув. – Тадндан гиж Би ю кесинь

медгджэнү? ¹³Тадн Намаг Багш, Деед Эзн гинэт. Чик, тертн мөн. Би, Деед Эзн, Багшв. ¹⁴Зуг келитн унаж өглөв. Ода тадн тиигж, нег-негнднь көл унах зөвтөт. ¹⁵Тадниг үлгүр автха гинэд, тиигж кетхэ гинэд, унаж өглөв. ¹⁶Үнэр келжэнэв. Зарц Эзнэс, элч Илгэснэс дээр биш. ¹⁷Энүг медэд, цугинь күцэжэх күн буйн-кишгтэ! ¹⁸⁻¹⁹Цугтаннь тускар келжэхшв. Кениг йиллж авсан меднэв. Зуг «Мини өдмг иджэснь өмнэсм харан өргв» гисн Бурхна Бичгин үгмүд бүттхэ! Энүг учрхин өмн Би ээлдж келжэнэв. Энүг учрсн хөөн БИ БЭЭНЭВ гисндм Тадн дарунь иткхит. ²⁰Үнэр келжэнэв. Мини илгэсн кү седклдөн орулдгнь Намаг орулжахань мөн. Бийим орулдгнь – Бийим Илгэсиг орулх, – гиж Исус келв.

Исусиг бэрж өгх күн

²¹Энүг келэд, цааранднь Исус икэр үүмэд:

– Тадн дундас негнь Намаг бэрж өгх гиж үнэр келжэнэв, – гив.

²²Сурһульчнр нег-негнүрн хэлэлдэд, кенэ тускар келжэхинь санад өврэд бөөцхөв. ²³Исусин хамгин дурта нег сурһульч Терүне өөр суув. ²⁴Шимон Пётр – кенэ тускар келжэхинь сур – гиж терүнд докъялж келв. ²⁵Тер сурһульч толһаһан Исусур өөрдүлэд:

– Деед Эзн минь! Терчн кемб? – гиж сурв.

²⁶– Мини шүүслж өгсн өдмгиг авсн күн тер болх, – гив.

Исус өдмг шүүслэд, Шимона Искериотин көвүнд Йудад өгв.

²⁷Йуда өдмг авсн цагт терүн дотр эрлг орж одв.

– Кех юман шулуһар ке, – гиж Исус терүнд келв.

²⁸Юңгад Исус терүнд тиигж келжэхинь нег чигн күн медсн уга. ²⁹Йуда мөңгнэ хоршалһна хээрцгтэ болсн учрас зэрмнь Исусиг терүг байрин өдрт юм хулдж автха, эс гиж мөңгнэ нег хувинь угатя эмтнд өгтхэ гиж зэрмнь санцхав. ³⁰Өдмгинь авад, Йуда дарунь гертэс харв. Харһу сө бөөж.

Шин заавр

³¹⁻³⁵Йуда һарад йовж одхла Исус:

– Ода Күмни Көвүн туурв. Терүгэр дамжад Бурхн туурв. Кемр Бурхн Күмни Көвүһэр дамжад туурсн болхла, Терүг Бурхн Эврэн туурулх, тер дарунь туурулх. Мини хээртэ үрдүд! Таднла бөөх цагм чилжэнэ. Намаг санад хээхит. Толһачнрт келсн үгэн таднд ода келжэнэв: Мини йовх һазрур тадн ирж чадшгот. Шин заавр

өгчэнэв: Нег-негндэн дурта болтн. Би таднд дурта болсн кевөр нег-негндэн дурта болтн. Кемр тадн тиигж бөөхлө, Мини сур-хульч гиж тадниг эмтн медх, – гиж келв.

Исус Пётрин гөрдлнэ тускар келжэнэ

³⁶– Деед Эзн Мини, Та альдаран йовжант? – гиж Шимон Пётр Исусас сурв.

– Мини йовсн назрур ода чи йовж чадшгоч, зуг хөөннь Намаг дахад йовхич, – гиж Исус хэрүднь келв.

³⁷– Деед Эзн минь! Юнгад би Таниг ода дахж эс йовж чад-жахмб? Би Тана төлө эмэн өгхд белнв, – гиж Пётр келв.

³⁸– Чи Мини төлө эмэн өгх белнч? Үнэр чамд келжэнэв, эр така эс хээкртл, чи хурв дэжж Нанас гөрдхч, – гиж Исус тиигх-лө келв.

Бурхн Эцкүр йовх хаалхин тускар

14¹⁻⁴– Тадна седкл бичэ үүмтхэ! Бурхнд итктн, Нанд бас итктн! Эцкимм герт хорас дала. Тадндан бээр белдхэр ода Би йовжанав. Тиим эс бээсн болхла, тиигж келшго билэв. Одад хорас белдснэ хөөн бээсн ормдан тадниг бөөлххэр Би хэрү нааран ирж тадниг авнав. Альдаран йовх хаалхинь меднэт!

⁵– Деед Эзн! Бидн Таниг альдаран йовхитн меджэхшвидн. Йовх хаалхитн ода яһж бидн медхвидн, – гиж Томас Исуст келв.

⁶⁻⁷Би – хаалһв, Би – үнн болн жирһлв, ханцхн Нанар дамжж Эцкүрм күрч чадхит. Кемр тадн Намаг медсн болхла, Мини Эц-киг бас медх билэт. Эн өдрэс авн тадн Терүг медэд үзхит, – гиж Исус келв.

⁸– Эцкэн маднд үзүлтн, дэжж юмн керго, – гиж Пилип келв.

⁹– Эцкэн үзүл гийһэд юнгад келжэхмч? Тиим дала цагт Би таднла бөөнөв, тер бийнь чи Намаг меджэхшийч. Намаг үзснь Эцким үзнэ. ¹⁰Намаг Эцклэ негдж бөөдгинь Эцкиг Нанла негдж бөөдгинь, чи иткжэхшийч? Таднд келсн үгэн Эврәннь нернэс келжэхшв. Нанла негдж бөөдг Эцк үүлэн күцэжэнэ. ¹¹Намаг Эцклэ негдж бөөдгинь, Эцкиг Нанла негдж бөөдгинь итктн! Тиим биш болхла Мини кесн үүлин төлө итктн. ¹²Үнэр келжэнэв Намаг Эцк талан йовжах учрас Нанд иткснь Мини

кесн үүл күцэхэд, энүнэс икэр күцэх. ¹³Мини нерн деерэс юм сурхлань цугинь күцэхв. Көвүһөрн дамжж Эцк туурх. ¹⁴Кемр Мини нерн деерэс тадн сурхлатн, Би сурсиг күцэхв.

Исус Эрүн Сәкүснә тускар келжәнә

¹⁵– Кемр тадн Нанд дурга болхла, Мини зааврмудыг күцөхит. ¹⁶Би Эцкәсн сурнав. Тер таднд талдан Туслгчиг илгэх. Тер мөңкиндән таднла үлдх. ¹⁷Тер Туслгч – Бурхна туск үн медүлдг Сәкүсн. Терүг үнн седкләрн орулж авх арн орчлнд уга. Тер юнгад гихлә, тедн терүг үзжәхш. Тедн Терүг меджәхш, һанцхн тадн Терүг меднәт. Ода Тер таднта бәәнә. Цааранднь чигн тадна дотр бәәх. ¹⁸Тадниг өнчәр үлдәлго, Би хәрү ирхв. ¹⁹Удл уга орчлң Намаг үзшго. Зуг тадн Намаг үзхит. Би әмд бәәхв, тер учрар тадн бас әмд бәәхит. ²⁰Тер өдрт тадн Намаг Эцкгә негдж бәәдгинь, тадниг Нанта негдж бәәдгинь, Намаг таднла негдж бәәдгинь медхит. ²¹Мини зааврмудыг хадһлдг, күцәдг күн Нанд дурга болна. Нанд дурга болдг күүнд Мини Эцкм дурлна. Би бас терүнд дурлхв. Бийән медүлхв, – гиж Исус хәрүднь келв.

²²– Деед Эзн, юнгад Та орчлнд биш һанцхн маднд бийән медүлхәр бәнт? – гиж Йуда (Искериот биш) келв.

²³– Нанд дурга болдгнь Мини заасар бәәх. Эцкм терүнд дурга болх. Терүн тал ирәд, бидн хамдан бәәхвидн. ²⁴Нанд дурго болдгнь Мини үгәр бәәшго. Тадна соңсчасн үгмүд Мини үгмүд биш, Намаг илгәсн Эцкинм үгмүд. ²⁵⁻²⁶Энүг Би таднла бәәсн цагт келжәнәв. Туслгчиг, Эрүн Сәкүсиг, Мини нерн деерэс Эцкм илгэх. Тер таднд цугинь зааж өгх. Мини келсн үгиг тадна сананд орулх. ²⁷Би таднд эв өгчәнәв. Эврәннь эвән таднд өгчәнәв. Эн орчлңгин кевәр эв өгчәхшв. Бичә үүмтн, бичә әәтн! ²⁸Би таднас салат йовжанав. Зуг Би хәрү ирхв гисн үгмүдм тадн урднь соңслат. Кемр тадн нанд йосндан дурга бәәсн болхла, тадн Намаг Эцкүрн йовжана гихәд икәр байрлх биләт. Тер юнгад гихлә, Эцкм Нанас үлү алдр. ²⁹⁻³⁰Би энүг урдаснь келжәнәв. Цугтан эн күцхлә, тадн Нанд иткхит. Дәкж Би таднд юм келж чадшгов. Эн орчлңгин нойн аашна. Намаг нойлх йосн терүнд уга. ³¹Зуг Би Эцкдән дуртав, Бурхна заасар үүлән күцәжәнәв. Энүг орчлң медх зөвтә! Бостн, ода йовий! – гиж Исус келв.

Исус уста үзмин иш мөн

15¹⁻³ Цааранднь Исус иигж келв: – Би – уста үзмин ишв. Уста үзм урһадгнь – Эцкм. Мини деер бөөсн темс өгдго бүчриг Тер чавчад хайчкна. Зуг темс өгдг бүчриг урһцта болтха гийһэд цеврлнэ. Тадн болхла ода Мини үгэр цеврлгдвт. ⁴Нанла хамдан негдж бөөтн. Би таднла бас негдж бөөхв. Бүчр ишин энг болсн учрас темс өгч чадна. Зуг бүчр эврэн бийнь темс өгч чадшго. Тиим кевэр тадн Нанла негдж эс бөөхлэ, темс өгч чадшгот. ⁵Би ишв, тадн бүчрмүд. Нанла негдж бөөдг күн болн Би терүнлэ негдж бөөхлэ, тер олзта темс өгнэ. Тадн Намаг угаһар юм күцэж чадшгот. ⁶Нанла негдж эс бөөдг күн уста үзм урһжасн ишэс салһад хайгдсн бүчр мет хумхарж хагсж одна. Тедниг цуглуулж һалд хайж шатана. ⁷Кемр тадн Нанла негдж бөөһэд үгм күцэхлэ, сурх юман сурхлатн – цугнь таднд өггдх! ⁸Кемр тадн дала темс өгхлэ, Мини сурһульчнр болсан үзүлхит. Энүгэр дамжад Эцкм туурх. ⁹Эцк Нанд хөөртэ бөөсн кевэр Би таднд хөөртөв. Мини хөөрнд багтад бөөтн! ¹⁰Тадн зааврмудм күцэхлэ, Мини хөөрнд багтхит. Тиигж Би Эцкин зааврмудыг күцөһэд, Эцкиннь хөөрнд багтжанав. ¹¹Эврәннь байрасн таднла хувалцхар, тадниг ик байрта бөөтхэ гийһэд энүг таднд келләв. ¹²Мини заавр эн: Би таднд дурлсн кевэр нег-негндэн дурлтн. ¹³Үүрмүдин төлө эмэн өгх дурнас деер дурн уга. ¹⁴Мини заасн үгмүд күцэж бөөхлөтн, тадн Мини үүрмүд. ¹⁵Дөкж тадниг зарцнр гиж келжэхшв. Зарц болхла Эзнэ кесиг медхш. Би тадниг Мини үүрмүд гиж нерөджәнэв. Юнгад гихлэ, Эцкэс медж авсан таднд медүлж өглэв. ¹⁶Тадн Намаг шүүж авсн угат. Би тадниг онц шүүж авлав. Орчлнд одад төрүц үрдго темс өгтхэ гиж Би таднд даалһлав. Тиигхлэ Эцкм таднд Мини нерн деерэс сурситн өгх. ¹⁷Мини заавр эн: Нег-негндэн дурта болтн!

Орчлңин дурго болһн

¹⁸Кемр орчлң таднд дурго болхла, тодлж автн: түрүлэд орчлң Нанд дурго болв. ¹⁹Тадн орчлңин эмтн бөөсн болхла, орчлң тадниг эврэ гиж дурта болх билэ. Зуг тадн орчлңин эмтн бишит, Би тадниг онц шүүж авад, орчлңгас салһв. Тегэд чигн орчлң таднд дурго. ²⁰Зарц эзнэс деер биш гисм тадн тодлвт?

Кемр Намаг көөсн болхла, тадниг бас көөх. Кемр Мини үгмүд күцөсн болхла, тадна үг бас күцэх. ²¹Зуг тадниг Нанд итксн төлөд тедн тиигж көөх. Юңгад гихлэ, Намаг Илгэсиг тедн медхш. ²²Кемр Би орчлнд эс ирсн болхла, теднд эс келсн болхла, тедн килнцдэн буру уга болх билэ. Зуг ода тедн бурута, яһад гихлэ, тедн Мини үгм кергтэн авсн уга. ²³Нанд дурго болсинь Мини Эцкдм дурго болна. ²⁴Кемр Би талдан күн күцэж чаддго кергиг эс күцөсн болхла, тедн буру уга болх билэ. Зуг ода тедн Мини керг-үүл үзв чигн одачн Нанд болн Эцкдм дурго. ²⁵Зуг теднэ Бичгт бөөсн «Учр угаһар Нанд дурго болж» гисн үгмүд бүтдгэр тиигх зөвтэ. ²⁶Зуг тадн тал Эцкэс һарчах Бурхна туск үнн медүлжэх Сәкүсн, Туслгч, ирхлэ, Би Терүг Эцкэсн тадн тал илгэхв. Тер Мини герч болх. ²⁷Тадн бийстн бас Мини герчнр. Тер юңгад гихлэ, эклцэс авн тадн Нанла хамдан бөөлөт.

16 Тадниг итклэн бичэ хайтха гихэд Би энүг келв. ²Тадниг хурлас салһх. Цагнь ирхлэ, тадниг алжасн эмтн Бурхнд церглжэсэн санх. ³Эцкм болн Намаг меддго төлөд тедн тиигж кех. ⁴^[a]Зуг Би энүг таднд урдаснь саглж келв. Тер цагнь ирхлэ, тодлтн: Би Энүнэ тускар таднд келлөв.

Эрүн Сәкүснэ үүин тускар

⁴^[b]Таднла хамдан бөөсн учрас түрүлөд Би энүнэ тускар таднд келсн угав. ⁵Намаг илгэсн тал ода Би йовжанав. Зуг тадн альдаран йовжанат гиж Нанас суржахшит. ⁶Мини келснэс көлтө седклтн зөвүрэр дүүрв. ⁷Зуг Би үнэр келжәнөв: тадна арһ хээхэр би йовжанав. Намаг эс йовхла, тадн тал Туслгч иршго. Би йовад Терүг таднур илгэхв. ⁸Тер ирэд эмтнэ килнцин тускар, Бурхта чик бөөхин тускар, Бурхна зарһин тускар ил цөөлһж секх. ⁹Эрүн Сәкүснэ секх килнцнь эн: эмтн Нанд иткхш. ¹⁰Бурхта чик бөөх гиснь эн: Би Эцк талан йовжанав, тадн Намаг дөкж үзшгот. ¹¹Зарһ гиснь иим: эн орчлнгин нойн зарһла харһв. ¹²Би кесг юм таднд келж чадх билэв. Зуг ода тадн Мини Үг дааж чадшгот. ¹³Бурхна туск үниг медүлдг Сәкүсн таднур ирхлэ, таднд цуг үниг медүлх. Юңгад гихлэ, Терүнэ келснь Бийэснь һарчах үгмүд биш. Сонссан Тер таднд келх, иргчин тускар бас келх. ¹⁴Тер Намаг туурулх. Юңгад гихлэ, Терүнэ келсн юмн Нанас авад, таднд медүлөд келсн юмн болх. ¹⁵Эцкдм бөөсн

юмн — Мини. Тер төлөд чигн Би келжэнэв, Тер Нанас авад, таднд медүлх. ¹⁶Удл уга тадн Намаг үзшгот. Зуг невчкн цаг давхла, дэкн үзхит.

Зөвүр болн байр

¹⁷⁻¹⁹ Сурһульчнрас зэрмнь нег-негндэн:

— Удл уга тадн Намаг үзшгот, зуг невчкн цаг давхла тадн дөкөд Намаг үзхит гисн үгмүд юн үгмүд болжахмб? Би Эцкүрн йовжанав гисн юмб? Невчкн цаг гисн үгмүдэр ю келхэр седсмб? Энүнэ келсн үгмүд маднд медгдж өгчэхш, — гиж келцхэв.

Исус тедниг ю сурхар седжэхинь медэд:

— Тадн нег-негнэсн, удл уга тадн Намаг үзшгот, зуг невчкн цаг давхла, дэкн үзхит гисн үгмүдиг суржант эсий? — ²⁰Үнэр келжэнэв. Тадн оркрж уульхит. Орчлң болхла байрлх. Тадн зөвүртэ бөөхит. Зуг тадна зөвүрин хөөн ик байр ирх. ²¹Күүкд улс гиигрх цагтан басл зовна. Яһад гихлэ, гиигрх цаг ирв. Үрэн һарһсна хөөн эн орчлнд шин күн төрв гиж тер байрлад зовсан мартчкна. ²²Тадн бас ода зөвүртэ бөөнэт. Зуг дөкөд тадниг үзхлэм, тадна зүркн байрар дүүрх. Тер байр таднас күн булаж авшго. ²³Тер өдр тадн Нанд сурвр өшшгот. Үнэр келжэнэв, Мини нерн деерэс Эцкэс ю сурвчн, Эцк таднд сурситн өгх. ²⁴Тадн одачн Мини нерн деерэс юм сурад угат. Сурх юман суртн, сурсан авад байрар дүүрхит!

Би эн орчлңиг дишлүв

²⁵Би энүг таднд үлгүрлж келлөв. Зуг цагнь ирхлэ, Би Эцкиннь тускар үлгүр угаһар ил келхв. ²⁶Тер өдрт тадн Мини нерн деерэс Эцкэсм юм сурхит. Тадна төлэ гиж Эцкэсн эрж сурнав гиж таднд келжэхшв. ²⁷Тадниг Нанд дурлсн төлөд, Намаг Эцкэс ирв гиж итксн төлөд, Эцкм Бийнь таднд дурга. ²⁸Би эн орчлнд Эцкэсн ирв. Ода дөкөд эн орчлңиг үлдөһөд, Эцк талан йовжанав, — гиж Исус келв.

²⁹— Ода Та үлгүр угаһар ил келжэнэт. ³⁰Эмтиг сурврмуд өгтл Та теднэ сурврмудиг урдаснь меднэт. Ода бидн энүг шинкэн медвидн. Тер учрар Таниг Бурхнас ирсинь бидн иткжэнэвидн, — гиж сурһульчнр келцхэв.

³¹— Ода тадн Нанд иткжэнт? ³²Соңстн, цагнь өөрдж йовна. Цагнь лавта ирв. Намаг һанцараһим үлдөһөд, тадн тарад гер

болһндан йовж одхт. Зуг Би һанцхн бишв, яһад гихлэ, Нанта Эцк бээнэ. ³³Нанла негн болж эв олтха гиж үүг Би танд келлэв. Эн орчлнд тадниг зовлң күлэжэнэ, зуг бийән чанһар бэртн. Би эн орчлңиг диилв! – гиж Исус хэрүднь келв.

Исусин зальврһн

17 Үгән төгсәһэд, Исус толһаһан өргэд, теңгр хөлөһэд: – Аав минь! Цаг ирв. Көвүн Таниг туурулхин төлө Көвүг туурул. ²Та цуг күмн әмтиг залх йос Терүнд өгвт. Тер учрар Көвүнтн Тана даалһсн әмтнд мөңк жирһл өгх. Тер зөвиг Та Әврән Терүнд өгвт. ³Мөңк жирһл гиснь: Таниг ор һанцхн Бурхиг болн Тана илгәсн Исус Христосиг медж авлһн. ⁴Би Таниг эн һазрт туурулв. Тана даалһсн кәдлмшиг күцәвүв. ⁵⁻⁶Ода Аав минь! Орчлң үүдәд тана һарар бүтәгдснә өмн Би Танла хамдан алдр нернд орсн биләв. Дәкн намаг тер бәәдлд орулыт. Нарт делкәһәс авад, Нанд өгсн Тана даалһсн алдр неритн әмтнд секв. Эн әмтн Тана. Та әдниг Нанд өгвт. Эдн Тана үгиг зүркндән хадһлв. ⁷Нанд өггдсн цугинь Танас һарчахинь эдн ода меднә. ⁸Тана келсн үгмүдиг Би цугинь эднд келв. Тедн үгитн седкләрн орулв. Намаг Танас ирснд, Та Намаг илгәв гиснд тедн йосндан иткв. ⁹Би эднә төлө суржанава. Би орчлңгин төлө биш, Тана өгсн әмтнә төлө суржанава. Тер юнгад гихлэ, эдн Тана. ¹⁰Нанд бәәсн юмн Тана. Танд бәәсн юмн Мини. Теднәр дамжад Би туурв. ¹¹⁻¹²Би эн орчлңгас һарад Танур йовжанава. Зуг эдн әмтнә дунд үлджәнә. Эрүн Аав, эдн мадһла әдл ни-негн болтха гихәд, Әврәннь нернә күчәр Та әдниг харстн. Та эн нериг Нанд өгләт. Эднлә бәәсн цагт Тана нернә күчәр Би әдниг харсж йовлав. Та эн нериг Нанд өгләт. Эднәс негнь чигн геедрсн уга. Зуг негнь геедрх зөвтәнь геедрв. Тер юнгад гихлэ, Бичгин үг бүтх зөвтә билә. ¹³Ода Би Тан тал йовжанава. Зуг һазр деер бәәсн цагт Мини ик байрар эдн дүүртхә гиж цугинь Би келжәнәв. ¹⁴Би эднд Тана үг келләв. Тер учрар орчлң эднд дурго болжана. Юнгад гихлэ, эдн Нанла әдл эн орчлңгин биш. ¹⁵Би әдниг эн орчлңгас автн гиж суржахшв. Та әдниг хар сәкүснәс харстн гиж суржанава. ¹⁶Эдн Нанла әдл эн орчлңгин биш. ¹⁷Үнәр әдниг әрүтктн. Тана Үг йосн үнн. ¹⁸Та Намаг орчлнд илгәсн метәр Би әдниг орчлнд илгәжәнәв. ¹⁹Әдниг Танд нерәдхәр экләд Бийән Танд нерәджәнәв. Эдниг үнәр Тана болтха гихәд тиигжәнәв. ²⁰Би

нанцхн эднэ төлө суржахшв. Би эднэ үгэр Нанд итхх эмгнэ тускар бас сурж бөөнөв. ²¹Тедн ни-негн бөөтхэ гиж Би зальвржанав. Аав, Та Нанла негдж, Би Танла негдж бээдгэр тедн Мандла негдж бөөтхэ. Тедн негдж бөөтхэ! Тегэд Та Намаг илгэсиг орчлн итхх. ²²Тана өгсн туурмжиг Би эднд өглэв. Эдн Маднла эдл ни-негн болтха гihэд тииглэв. ²³Тедниг негдүлхэр Би теднлэ негдж бөөнөв, Та Нанла негдж бөөнөт. Эн учрас Та Намаг илгэвт гиж Нанд дурга болсн кевэр теднд дуран өгнөт гиж орчлн медх. ²⁴Аав! Тана өгсн эмтн Нанла хамдан бөөтхэ. Мини бөөсн назрт тедн бас бөөтхэ, гиж Танас суржанав. Тедн Мини туурмжиг үзгхэ. Тер туурмжиг Та орчлн үүдэд уга бөөтл Нанд ик хөөртэ болад өглэт. ²⁵Үнн чик Аав! Орчлн Таниг медсн уга. Би Таниг меднэв. Болв Та Намаг илгэсиг эдн меднэ. ²⁶Тиигж Нанд өгсн Тана дурн эдниг дүүргтхэ гihэд болн Намаг теднлэ негдж бөөтхэ гihэд, Би эднд Тана тускар секв. Болв цааранднь секэд бөөхв.

Исусиг бэржэ өглн болн бэрлн

18 Исус зальврсна хөөн сурхульчнртаһан Кедрон гидг салаг дэврэд, садт ирв. ²Йуда гидг урвач тер назриг меддг билэ, Исус сурхульчнртаһан оньдин тиигэрэн ирдг бөөсмн. ³Йуда тиигэрэн Римин цергүдиг, гелнүдин болн паршмудын илгэсн сүмин харулчнриг дахулсн бас ирв. Тедн шам бөрсн, зер-зевтөһөн ирцхэв. ⁴Исус Терүнлэ юн учрхинь медэд бөөв.

– Кениг хөөжөнөт? – гиж Исус өмөрөн һарад теднэс сурв.

⁵– Назаретин Исусиг, – гиж тедн хөрү өгв.

– Тертн Бив, – гиж Исус келв.

Йуда гидг урвач бас теднэ өөр зогсжала. ⁶Исус «Бив» гисн цагт тедн цуһар ардагшан цухрад назр элқдж унцхав.

⁷– Кениг хөөжөнөт? – гиж Исус давгад теднэс сурв.

– Назаретин Исусиг, – гиж тедн хөрү өгцхэв.

⁸– Би таднд Тертн – Бив гисн бөөнөлм, кемр Би таднд кергтэ болхла, эдниг тэвж йовултн, – гиж Исус келв.

⁹«Тана өгсн эмтнэс негинь чигн Би геесн угав», гисн үгмүд тиигэд бүтв. ¹⁰Симона Пётрт үлд бөөж. Тер үлдэн өргэд, ах гелнгин зарцин барун чикинь тээрэд хайчкв. Тер зарцин нернь Малх бөөж.

¹¹– Үлдэн дүр! Мини Эцкин белдсн зовлнгиг Би эдлх зөвтэв, тиим эсий? – гиж Исус Пётрт келв.

Исус ах гелңгин өмн

¹² Римин цергүд ахлачтаһан болн сүмин харулчнр Исусиг бәрж авв. Тедн Исусиг күләд, Анас тал авч ирв. ¹³ Юңгад гихлә, Ханас Кәәпин хадм эцк бәәж. Тер жилд Кәәп ах гелң болсмн.

¹⁴ – Нег күн цуг келн әмтнә төлә үксн деер болх, – гиж урднә Кәәп евреймүдин толһачнрт келсн билә.

Пётрин гөрдлһн

¹⁵ Симон Пётр болн дәкәд нег сурһульч Исусин ардас йовсн бәәж. Тер сурһульч ах гелңгин сән таньл бәәсн учрас Исусиг даһад, герин хашад орж чадв. ¹⁶ Пётр болхла үүднә ца үлдәд зогсв. Ах гелңгин таньдг сурһульч һарад, үүднә өөр зогсдг зарц күүкд күүнлә күүндәд, Пётриг герин хашад орулв.

¹⁷ – Та эн күүнә сурһульчнрин негнә биший? – гиж тер зарц күүкд күн сурв.

– Уга, – гиж Пётр хәрү өгв.

¹⁸ Һаза серүн билә. Зарцнр болн Римин цергүд һал шатаһад, терүнә цогин өөр дуладад зогсж. Пётр бас дуладхар тедн дунд зогсв.

Ах гелң Исусиг мөшкнә

¹⁹ Тер цагт ах гелң Исусиг сурһульчнриннә тускар болн номин тускар мөшкв.

²⁰ – Би цуг әмтнд иләр келдг биләв, Би хурлмудт эс гиж сүмд номан умшад, әмтиг сурһдг биләв. Тенд кесг евреймүд цуглрдг билә. Нууц юм Би келдго биләв. ²¹⁻²² Юңгад тадн Намаг мөшкәд бәәнәт? Намаг соңссн әмтнәс суртн. Тедн Мини келсн үг меднә, – гиж Исусиг эн үгмүд келснә хөөн, Терүнә өөр зогсжасн сүмин харулчнрин негнә Исусиг халхарнә ташв:

– Чи ах гелңглә ямаран кевәр күүнджәхмч! – гихәд тернә келв.

²³ – Кемр Би буру үг келсн болхла, буруһинь йилһж кел. Кемр чик келсн болхла, яһад Намаг цоквч?

²⁴ Хана күләтә Исусиг Кәәп гидг ах гелңгүр илгәв.

Пётрин хойрдгч гөрдлн

²⁵ Симона Пётр халын өөр дуладж бөөхд, терүг дэкэд нег күн:

– Чи Энүнэ сурһульчнрин негнь бишвч? – гиж сурла.

– Бишв, – гиж тер хэрүцв.

²⁶ Тиигхлэ ах гелнгин зарц Пётр чикинь тээрсн зарцин садн:

– Тер садт теднлэ хамдан бээсн чи мөн бишвч? – гив.

²⁷ Пётр саак кевөрн гөрдв, генткн эр така хээкрв.

Исус Пилатын өмн

²⁸ Евреймүд Исусиг римин закрач Пилатын бээшнд авч ирц-хэв. Песахин байрин өрүнэ цаг билэ. Евреймүд бийэн бузр-дашгоһар бээшн дотрнь орсн уга. Орсн болхла, тедн Песахин байрла асхни хот эдлх зөв уга болх билэ. ²⁹ Тегэд чигн Пилат тедн тал һарв.

– Юунас көлтэ тадн эн күүг гемшэжэхмбт? – гиж тер сурв.

³⁰ – Эн йос эс эвдсн болхла, бидн Энүг чамур авч иршго билэвидн, – гиж тедн хэрү өгв.

³¹ Пилат:

– Энүг тадн бийстн авад, эврәннь Закаһар зарһинь кетн, – гив.

– Мадн кү үкүлхөр цаажлх зөв угавидн*, – гиж евреймүд хэрү өгв.

³² Тиим кевөр Исус ямаран үклэр үкх гисн үгмүд бүтэгдх зөвтг бээсмн. ³³ Тиигхлэ Пилат бээшн дотран орад, Исусиг дуудж авад:

– Йудья улсин хан чивч? – гиж сурв.

³⁴ – Чи энүг эврән келжәнч, али чамд Мини тускар тиигж талдан өмтн келв? – гиж Исус хэрүднь сурв.

³⁵ – Би кемб? Еврей болжахмб? – гиж Пилат хэрү өгв.

– Эн чини келн-өмтн, чини ахлачнр чамаг мини һарт бөрүлв. Чи ю кесмбч?

³⁶ Исус:

– Мини алвт эн орчлнгин биш. Кемр алвтм эн орчлнгин бэ-эсн болхла, Мини алвтнр Намаг евреймүдин толһачнрас харсх билэ. Мини алвт эн орчлнгин биш, – гив.

* Евреймүд кү үклин цаажла харһулх зөв уга бээж. Тер учрар тедн Исусиг Римин йосна һарт өгв. Римин йосар болхла, тер кирсд хадж цаажлгдх зөвтг билэ.

³⁷ – Чи хан болжахмч? – гиж Пилат сурв.

– Чи үнэр келжэнэч. Би – ханв, – гиж Исус келв, – Би төрэд, эн орчлң тал үннэ тускар герчлхэр ирв. Зөвтэ Үнниг медсн күн Намаг соңсна. ^{38[а]} Пилат:

– Үнн гидг юмб? – гиж сурв.

Исусиг үклин цаажла харһулсь

^{38[б]} Цааранднь Пилат назаран һарад евреймүдт келв:

– Би эн күүг гемшэх учр үзжэхшв. ³⁹ Танад тиим авъяс бөөнө: Песахин байрт бэрэнд суусн әмтнәс негинь сулдхх кергтә. Йудья улсин хааг сулдххар седжәнт?

⁴⁰ Тедн цуһар:

– Уга! Энүг биш! Бар-Абаг сулдх! – гиж хәәкрв.

Бар-Аба болхла деермч күн бәәсмн.

19 Тииглә Пилат Исусиг маляһар цоктн, гиж цергүдт закв. ² Цергүд хатхдг көглин ацмудар титм гүрәд, Исусин толһа деернь өмскв. Дәкәд тедн улан лавшг Терүн деер хаяд, ³ даран-даранднь Исус тал өөрдәд:

– Йудья улсин хан менд болтха! – гиж хәәкрәд, наад бәрәд цокж зоваһад бәәв.

⁴ Пилат дәкн әмтнүр һарад:

– Хәләтн! Би Энүг цаажла харһулх буру юм һарһснь нанд медгдхш. Тегәд таднур дәкәд Энүг һарһв, – гив.

⁵ Исусиг көгл титмтәһинь болн улан лавшгтаһинь һарһад зогсаһлань:

– Тер күн эн бәәнә, – гиж Пилат келв.

⁶ Ах гелңгүд болн сүмин харулчнр Исусиг үзәд цуһар:

– Кирст хадул! Кирст Энүг хадул! – гихәд хәәкрцхәв.

– Энүг авад бийстн кирст хадултн. Би болхла Энүнә кесн буруһинь үзжәхшв, – гиж Пилат хәрүцв.

⁷ – Мана Закаһар Эн күн үкх зөвтә. Әнтн бийән Бурхна Көвүн гиж нерәднә! – гиж евреймүд эврәһәрн кехәр келцхәв.

⁸ Цуг энүг соңссн Пилат улм сүрдв. ⁹ Тер дәкәд эврәннь бәәшнгүрн орад:

– Чи кенәхнәвч? – гиж Исусас сурв.

Зуг Исус тагчг, үг келлго зогсв.

¹⁰ – Чи нанла күүндхәр седжәхшийч? Чамаг сулдхх эс гиж кирсд хадулх йосн нанд бәәдгинь Чи меджәхшийчи? – гиж Пилат келв.

¹¹ – Кемр чамд эн йос тенгрэс эс өгсн болхла, чи Намаг бэрх йосн уга болх билэч. Тер учрар Намаг чини харт бөрүлсн күүнэ килнц чини килнцэс ик болх, – гиж Исус хэрү өгв.

¹² Терүг келснэ хөөн Пилат Исусиг сулдхх арһ хээв.

– Кемр чи Эн күүг сулдххла, чи Римин хаана үр биш болхич. Би ханв гисн күн Римин хаана өшөтн болжана! – гиж евреймүд дэки хээкрцхэв.

¹³ Пилат теднэ үгмүд соңсад, Исусиг харһж авад, эврэн зарһчин ормдан суув. Тер орм чолуһар кесн өндр орм бээж, еврей келэр Габат гиж нерэдгдсмн. ¹⁴ Песах гидг байрин өмн басң өдр билэ. Удин цаг бээж.

– Хэлэти, эн тана хан, – гиж Пилат евреймүдт келв.

¹⁵ – Энүг цааран йовул, цааран! Кирст хадул Энүг! Кирст! – гиж тедн хээкрцхэв.

– Тадна хааг кирст хадулхмб? – гиж Пилат сурв.

– Мана Римин хаанас даву хан уга, – гиж ах гелнгүд хэрү өгцхэв.

^{16[a]} Аш сүүлднь, Пилат Исусиг кирст хадулхар цергүдин харт өгв.

Исусиг кирст хадулснь

^{16[b]-17} Тедн Исусиг авад йовцхав. Эврәннь кирсэн авад, Исус Навлын орм тал йовв. Еврей келэр Голгот гидг һазр бээж. ¹⁸ Тенд Исусиг кирст хадулв, Терүнлэ хамдан барун болн зүн талнь дэкэд хойр кү цаажлв. Исус теднэ тал дунднь бээсмн. ¹⁹ Пилат харһа модыг белдэд, кирс деер хадултн гиһэд цергүдт закв. Тер харһа моднд: «Назаретин Исус – Йудья улсин хан» гиж бичэтэ бээсмн. ²⁰ Тер бичсн үгмүдиг кесг евреймүд умшсмн, юнгад гихлэ, Исусиг цаажлсн һазр балһсна өөр бээж. Тер үгмүд еврей, Рим болн грек келнд бичэтэ бээж. ²¹ Ах гелнгүд Пилатд энтн хажһр гив.

– «Йудья улсин хан» гиж бичэ бичтн. «Тер: Би Йудья улсин хан гиж келнэ» гиһэд бичтн, – гиһэд тедн келцхэв.

²² – Бичх юман бичв, – гиж Пилат хэрү өгв.

²³ Цергүд Исусиг кирст хадсна хөөн Терүнэ хувцинь авад, дөрвн энгд хував, күн болһнд күрв. Хитон гидг Исусин хувцинь болхла уйдл уга бүкл билэ.

²⁴ – Энүг хувахмн биш. Жирв хайхм, кенд тусна, тернь авчана, – гиж тедн шиидв.

Тиигж Бурхна Бичгт бээсн үгмүд күцв: «Тедн хоорндан зөрм хувцим хувала, болв наадк хувцна төлө жирв хайла». Цергүд тер келсиг күцэв. ²⁵ Исусин кирсин өөр Терүнэ эк, наһц эгч, Клөпэн гергн Марий болн Магдален хотна Марий зогсла. ²⁶ Исус эврәннь экэн болн хажуднь зогссн дурта сурһульчиг үзв.

– Аак, эн чини көвүн, – гиж Исус экдэн келв.

²⁷ Эврәннь сурһульчдан Исус:

– Эн чини экчнь, – гив.

Тер өдрин хөөн сурһульч Исусин экинъ герүрн авв.

Исусин үкл

²⁸ Исус цуг юмиг күцэгдсинъ медлэ, тегэд Бурхна Бичгиг бүклднь күцэхин төлө Тер келв:

– Би ундасжанав.

²⁹ Тенд буһшт чаһр бээж. Цергүд терүнд кенчр норһад, моднд өргэд, Исусин урлд күргв. ³⁰ Исус тер чаһриг амсад, келв:

– Күцв!

Эн үгмүдин хөөн Терүнэ толһань өрч деернь унад, эмнь цогцасн һарв.

Цергч Исусиг хэврһәрнь шаасна тускар

³¹ Басн өдр билэ, маһдуртнь бемб өдр болх бээж. Бемб өдрлэ кирс деер үксн цогц бээх йосн уга бээж. Дэкэд болхла, бемб өдр – онц Песахин өдр билэ. Тер учрар евреймүдин толһачнр кирс деер хадата эмтнэ көлинъ хамхлад, цогцснь кирс деерэс буулһх зөв Пилатас сурв. ³² Цергүд ирэд, нег хадата күүнэ көлинъ хамхлад, наадк күүнэ көлинъ хамхлв. ³³ Тедн Исусур өөрдлэ, Исус эмн уга бээж, тер учрар тедн Терүнэ көлинъ хамхлсн уга. ³⁴ Зуг нег цергч жидэр Исусиг хэврһәрнь шаав, цусн усн хойр Исусин цогцас асхрв. ³⁵ Цуг энүг үзсн күн тадниг итктхэ гиһэд, энүнэ тускар герчлжәнэ. Терүнэ герчллһн үнн, болв тер үн келжэсэн меднэ. ³⁶ Бурхна Бичгин «Терүнэ нег чигн ясн хуһршго» гисн үгмүд күцхин төлө цуг эн йовдл учрв. ³⁷ Бичгт дэкэд нег халхд бичэтэ билэ: «Тедн шаагдсн күүнүр хэлэх».

Исусиг оршалһн

³⁸ Хөөннь Ариматьяс ирсн Йосип Исусин цогциг Пилатас сурв. Йосип Исусин нууц сурһульч бээсмн. Юнгад гихлэ, тер

евреймүдин толһачһрас аэдг бээж. Пилат зөв өгхлэ, тер ирэд, Исусин цогциг авв. ³⁹Йосипла хамдан Никодим ирв. Тер Никодим Исусур сөөд ирдг билэ. Никодим һучн килограмм канһисн смири болн алоэ гидг сээхн үнртэ тос авч ирв. ⁴⁰Тедн Исусин цогциг кирсэс сулдхад, цогциднь сээхн үнртэ тос түркэд, кенчрэр орав, еврей әмтнә йосар цогциг тиигж оршадг бээж. ⁴¹Исусиг цаажһисн ормд сад бээж, тер сад заагт шин кесн хадын көндө бөөсмн. Тер көндөд күн оршагдад уга бээж. ⁴²Тегәд Песах байрин өдрмүд өөрдж йовсн цаг билэ. Тер хадын көндө өөрхн бөөсн учрас Исусиг тенд оршав.

Исусин әмдрһни

20 Өр цәәтл шин долан хонгин түрүнк өдр элһин өмн Магдален хотна Марий харһуһар үкәр тал йовна. Өөрдәд ирхләнә, үкәр хаасн хад чолун тедүкнд кевтсинь үзв. Үкәрнә секәтә бээж. ²Тер Симона Пётрүр болн Исусин дурта сурһульч тал гүүж ирәд:

– Тедн Деед Эзиг үкәрәснә һарһад авад йовж оч, цогцинь альд орксинь бидн междәхшвидн! – гиж келв.

³Пётр тер сурһульчта хамдан тер дарунь үкәрүр йовцхав. ⁴Тедн хоюрн гүүж. Зуг тер сурһульч Пётриг күцәд үкәрүр түрүләд гүүж ирв. ⁵Үкәр дотр шаһаж хәләһәд, тенд Исусиг орасн оршалһна кенчр үзв. Зуг сурһульч үкәр дотр орсн уга. ⁶Дәкәд терүнә ард йовсн Симон Пётр гүүж ирәд, үкәр дотр орв. Исусин цогциг орасн кенчр ⁷болн толһаһинь боосн альчур бас үзв. Тер альчур наадк кенчрмүдәс талдан ормд әвкәд тәвгдсн бээж. ⁸Тиигхлә түрүләд үкәрүр гүүж ирсн наадк сурһульч бас үкәр дотр орв. Тер үзәд иткв. ⁹Бурхна Бичгәр Исусиг әмдрһинь тедн ода чигн меҗәд уга бээж. ¹⁰Сурһульчнр герүрн хәрв.

Магдален хотна Марий Исус хойр

¹¹⁻¹²Марий үкәрин өөр ууляд зогсв. Уульн бээж тер үкәр дотр шаһаж хәләв. Генткн цаһан хувцта хойр Бурхна элһнриг тер үзв. Тедн Исусин цогц кевтсн ормд сууж, негнә толһаднә, дарукнә көлднә. ¹³Бурхна элһнр Марийас:

– Күүкн, чи юнгад уульжахмч? – гиж сурв.

– Тедн мини Деед Эзиг авад йовж одв. Болв Терүг альд тәвсинь би междәхшв, – гиж тер хәрү өгв.

¹⁴Күүкд күн хэрү эргэд хэлэв, генткн тенд Исусиг үзв. Зуг Исусиг Бийнь зогсжахинь тер йосндан таньж медж чадсн уга.

¹⁵– Күүкн, юнгад уульжахмч, кениг хээжэхмч? – гиж Исус келв. Марий Исусиг сад хэлэдг күн гиж санад келв:

– Эзн минь, кемр Чи Исусиг авад йовж одсн болхла, цогцинь альд тэвсэн кел, би йовад авнав.

¹⁶– Мирьям, – гиж Исус терүнд келв.

Күүкд күн Терүнүр эргж хэлэхэд, еврей келэр:

– Раввунни! (Багш гидг үг), – гиж хөөкрв.

¹⁷– Дэкж Нанур харан бичө күрг! Би Эцкүрн деэгшэн харад угав. Мини дүүнр тал йовад кел: Би эврәннь Эцкүр болн тадна Эцкүр хэржэнэв, Мини Бурхн тал, тадна Бурхн тал, – гиж Исус келв.

¹⁸Магдален хотна Мирьям сурһульчнр тал йовад:

– Би Деед Эзиг үзв! – гиж келв.

Исусин келсн үгмүдиг теднд тер келж өгв.

Сурһульчнр әмдрсн Исусла харһжана

¹⁹Асхн долан хонгин түрүнк өдртнь сурһульчнр цуглрсмн. Тедн евреймүдин толһачнрас әәһәд, үүдән төдглж. Үүднь төдтә бәәсн бийнь Исус ирәд:

– Бурхн тадниг өршәтхә! – гиж келәд,

²⁰Сурһульчнртан эврәннь хойр харан, хәврһән үзүлв. Тедн цуһар Деед Эзиг үзәд, икәр байрлцхав.

²¹– Бурхн тадниг өршәтхә! Эцкм Намаг илгәсн кевәр Би тадниг илгәжәнәв, – гиж Исус келәд, ²²тедн тал үлөһәд, келв:

– Әрүн Сәкүсиг автн, – гив.

²³– Кемр тадн күүнә килнц тәвж өгхлә, Бурхн терүнә килнц тәвж өгх. Болв кемр тадн күүнә килнцинь эс тәвж өгхлә, Бурхн терүнә килнц тәвж өгшго, – гиж Исус келв.

Исус Томас хойр

²⁴Исусиг ирсн цагт Икрин өрәсн Томас, арвн хойр сурһульчнрин негнь уга бәәж.

²⁵– Бидн Деед Эзиг үзләвидн! – гиж талдан сурһульчнр терүнд келв.

– Хадасн орсн ормиг һартнь үзәд эс кәндәтл болв хәврһднь бәәсн шавинь эс кәндәтл би төрүц иткшгов, – гиж Томас хәрү өгв.

²⁶Долан хонг давсна хөөн сурхульчнр саак кевөрн нег герт цуглрв. Тер цагт Томас бас теднлэ бөөв. Үүдн төдгтэ бөөлэ, зуг Исус дэkn үзгдэд, сурхульчнрин дунд зогсад:

– Бурхн тадниг өршөтхэ! – гиж келв.

²⁷– Эврәннь хурхан өг нааран, Мини һар хэлэ. Һаран өгэд Мини хэврһм көндэ. Маһдл уга итк! – гиж Исус Томаст келв.

²⁸Томас:

– Деед Эзн минь болн мини Бурхн! – гиж хэрү өгв.

²⁹Исус:

– Чи Намаг үзэд итквч. Намаг үзлго иткдг күн буйн-кишг-тэ! – гив.

Эн дегтрин тускар

³⁰Кесг өвөрц темдг Исус сурхульчнртан үзүлв. Теднэ тускар эн дегтрт бичгдсн уга. ³¹Исус Бурхна илгэсн Аврач Бурхна Көвүн гиж иткүлхин төлэ, болв иткэд Терүнэ нернэ төлэд мөнк жирһл эдлж бээтхэ гиж эн дегтр бичгдсн бээж.

Исус долан сурхульчнрт үзүлсь

21 Хөөннь Исус Тиберэд нуурин өөр сурхульчнрт үзгдв. Эн иигж учрв. ²Шимона Пётр, Икрин өрөсн Томас, Һалилья Канын Натаналь, Зебедайин көвүн болн дөкэд хойр сурхульч хамдан цуглрж. ³Шимона Пётр:

– Би заһс бэрхэр йовнав, – гив.

– Бидн бас чамта хамдан йовनावидн, – гиж тедн келцхэв.

Тедн нур тал ирэд онһц дотр орцхав. Зуг тер сөөд юм бэрж авсн уга. ⁴Өр цээхлэ, Исус тедниг усна көвөд күлэж, зуг сурхульчнр Исусиг таньсн уга.

⁵– Үүрмүд Мини, заһсн бөөнү? – гиж Исус тедниг дуудж сурв.

– Уга, – гиж сурхульчнр хэрү өгв.

⁶– Онһцин барун талан гөлм хайтн, заһс бэрж авхит, – гиж Исус келв.

Тедн гөлмөн хаяд ик дала заһс бэрэд, эрэ гиж терүг һарһж авв.

⁷Исусин хамгин хээртэ сурхульч Пётрт:

– Энтн Деед Эзн! – гиж келв.

Шимон Пётр Деед Эзн гисинь сонсад, деерк хувцан бий дее-рэн хаяд, (тер юнгад гихлэ, белкүсцэһэн нүцкн бээж) онһцас уснд орв. ⁸Наадк сурхульчнр онһц дотр бөөһэд, заһсар дүүрн

гөлм татн бөөж Пётрин ардас дахж йовв, усна көвө күртл зу метр шаху үлдсн билэ. ⁹Тедн онһцан тэвэд, эрг деер нархла, шачасн дендр үзв. Терүнэ цог деернь шаргджах захсн, өөрнь болһсн өдмг бөөж.

¹⁰ – Бэрж авсн захснас тадн невчкниг нааран авч иртн, – гиж Исус теднд келв.

¹¹ Шимона Пётр онһц дотр орад, гөлмиг уснас татж авад назрт хайв. Тедн зун тэвн һурвн ик захс бэрж авч. Тиим дала захс дааһад, гөлм тасрсн уга бөөж.

¹² – Наартн, хотан уутн, – гиж Исус сурһульчнрт келв.

Сурһульчнрас нег чигн күн кембт? гиж зөрглж сурсн уга. Терүг Деед Эзн гиж тедн медв. ¹³ Исус өөрдэд өдмг захс хойриг теднд өгв. ¹⁴ Эмдрснэ хөөн Исус сурһульчнрт һурвад үзгдсмн.

Исус Пётр хойр

¹⁵ Хотын хөөн Исус:

– Йохана көвүн Шимон, чи эднэс үлү Нанд дурта бөөснь үнэрий? – гиж Шимон Пётрт келв.

– Тиим, Деед Эзн. Би Танд яһж дурта болдгинь Та эврэн меднэт, – гиж тер хэрү өгв.

– Тиигхлә Мини хурһдыг хэрүл, – гиж Исус келв.

¹⁶ – Йохана көвүн Шимон, чи Нанд дуртавч, угай? – гиж Исус Пётрәс хойрдад сурв.

– Тиим Деед Эзн. Яһж би Танд дурта болдгинь Та эврэн меднэт, – гиж Пётр келв.

– Мини хөөдиг хэлә, – гиж Исус хэрү өгв.

¹⁷ – Йохана көвүн Шимон, чи Нанд дуртавчи? – гиж Исус Пётрәс һурвад сурв.

Исусиг һурвад суржаснд Пётр гейүрэд:

– Деед Эзн, Та цугинь меднэт, Намаг Танд икәр дуртаһинь бас меднэт, – гив.

– Мини хөөдиг хэрүл, – гиж Исус терүнд келв.

¹⁸ – Үнәр чамд келжәнәв, баһ цагтан чи эврэн бийән нег мөсләд, дурта назрт йовдг арһта биләч. Зуг чамаг көгшрхлә, һаричнь бооһад талдан күн чамаг дурго назрт авад йовх.

¹⁹ Эн үгәр Исус Пётриг ямаран үкләр үкхинь келсн бөөж. Тер үкләр Пётр Бурхиг туурулх. Цааранднь Исус Пётрт:

– Намаг даһад йов, – гив.

Исус болн Терүнэ дурта сурхульч

²⁰ Пётр ардагшан хэлэхэд, Исусин дурта сурхульчиг үзв. Тер сурхульч асхни хот уусн цагт Исуст толһаһан өөрдүлэд: «Деед Эзн, кен Чамас урвх?» – гиж сурла.

²¹ Терүг үзэд, Пётр:

– Деед Эзн, энүнлэ юн учрх? – гиж сурв.

²² – Кемр Намаг хэрү иргл энүг эмд бөөлхөр седхлэ, чамд юн кергв? Чи Намаг дахад йов, – гиж Исус хәрүднь келв.

²³ Эн үгмүдин хөөн сурхульчнр заагт тер сурхульч үкшго гисн зэнг тарв. Зуг Исус үкшго гиж келсн үга:

– Кемр Намаг хэрү иргл, энүг эмд бөөлхөр седхлэ, чамд юн кергв? – гиж келсн.

²⁴ Цуг Энүг герчлжэсн, цуг энүг бичснь Исусин келжэсн сурхульч. Бидн цуһар меднэвидн, эн герчлһн үнн.

Сүл үгмүд

²⁵ Исус олн юм күцэв. Кемр цугинь бичж авхла, Терүнэ тускар бичгдсн дегтрмүд цуг нарт делкэд багтлго чигн бөөх билэ.